


ANG BINHI SA KASUKWAHIAN

 Akong napili karong gabii alang sa usa ka teksto, o sa mubong pagbasa, kung itugot sa Ginoo, sa paghatag kanato sa unod niini, gikan sa San Mateo 13:24 hangtud sa 30. Ug pagkahuman usab akong—gusto ko nga basahon gikan sa 36 hangtud sa 40, sa pipila lang ka gutlo. Karon sa San Mateo, sa ika-13 nga kapitulo, ug sugod sa ika-24 nga bersekulo sa ika-13 nga kapitulo sa San Mateo. Maminaw'g maayo sa pagbasa sa Pulong. Ang akong mga pulong mapakyas, apan ang Iyaha dili gayud.

Usa na usab ka sambingay iyang giasoy kanila, sa pag-ingon, Ang gingharian sa langit sama sa usa ka tawo nga nagpugas sa maayong binhi sa iyang uma:

Apan samtang siya natulog, miabot ang iyang kaaway ug nagpugas sa bunglayan sa taliwala sa trigo, ug milakaw.

Apan sa nagtubo na ang mga dahon sa trigo, ug namunga, midayag usab ang bunglayan.

Gani nanagpanuol ang mga ulipon sa amahan sa panimalay ug nanag-ingon kaniya, Senyor, dili ba maayo man kadtong binhi nga gipugas mo sa imong uma? Naunsa bang anaa may mga bunglayan?

Ug siya nag-ingon kanila, Usa ka kaaway nag-buhat niini. Ug ang mga ulipon nanag-ingon kaniya, Buot ba ikaw nga mangadto kami. . . pangibton namo sila?

Apan miingon siya, Ayaw; kay tingali nga sa pag-ibut ninyo sa bunglayan, maibut usab ninyo pag-apil ang trigo.

Pasagdi ninyo nga managtubo una sila pagdungan hangtud sa pag-ani: ug unya sa panahon na sa ting-ani Ako magapadala sa mga mangangani, Ibtan ninyo una ang bunglayan, ug hugpungon sila sa pinungpong aron sa pagsunog kanila: apan tigumon ninyo ang trigo sa akong dapa.

² Namatikdan ba ninyo, “Hugpungon ang mga bunglayan una, ug pungpong sila”? Karon, sa pagbasa niini, may talagsaong butang nga miabot kanako samtang atua ako didto nagalingkod sa kintas-an sa Kabukiran sa Catalina sa miaging gabii, sa pag-ampo. Ug nahunahunaan ko dayon, kung asa ko kaha mahimong kuhaon ang pulong nga magamit ko alang niining buot kong hisgotan karong gabii?

³ Ug miadto ako ug nakaplagnan ko ang pulong nga *kasukwahian*, busa gikuha ko ang diksyunaryo ug gitan-aw

kung unsa ang kahulogan sa pulong nga *kasukwahian*. Ug ang kahulogan niini maoy “nagapugas sa pagpakigbingkil,” o—o, “ang pagkamasupakon,” sumala sa ginaingon ni Webster, “nagapugas sa pagpakigbingkil, butang nga lahi gayud,” o, “ang pagkamasupakon sa kung unsay anaa na.” Busa akong nahunahunaan, ang teksto karong gabii, tawagon ko kini og: *Ang Binhi Sa Kasukwahian*. Ug nagasalig ako nga panalanginan sa Ginoo ang Iyang Pulong karon samtang atong duolon Kini.

⁴ Ug atong nasayran usab nga Iyang gihubad, sa bersekulo 36 ug—ug hangtud sa 43, kung giunsa nga mihamtong kining binhia. Ug samtang nga anaa kita niini, ato lang pud basahon kana, ang bersekulo 36 karon og hangtud sa 43.

Ug sa dihang gipapauli na ni Jesus ang mga panon sa katawhan, misulod Siya sa balay: ug mingduol kaniya ang iyang mga tinun-an, nga nanag-ingon, Saysayi kami sa samingay mahitungod sa mga bunglayon diha sa uma.

Ug mitubag Siya ug nag-ingon kanila, Ang nagpugas sa maayong binhi mao ang Anak sa tawo;

Ug ang uma mao ang kalibutan; ang maayong binhi mao ang mga anak sa gingharian; apan ang mga bunglayon mao ang mga anak sa dautan;

Ang kaaway nga nagapugas kanila mao ang yawa; ang pag-ani mao ang katapusan sa kalibutan; ug ang mga mangangani mao ang mga manulonda.

Busa ingon sa pag-ibut sa bunglayon ug pagsunog sa kalayo; mao usab kini ang mahitabo sa katapusan sa kalibutan.

Magapadala ang Anak sa tawo sa iyang mga manulonda, ug ilang tapukon ug hakuton pagawas sa iyang gingharian ang tanang mga hinungdan sa pagkapanagdol, ug ang mga nagabuhat sa kadautan;

Ug igasalibay sila ngadto sa kalayo, usa ka hudno sa kalayo: ug didto mahitabo ang pagdangungoy, o mahitabo ang paghilak ug pagkagut sa mga ngipon.

Unya ang mga matarung managsidlak ingon sa adlaw didto sa gingharian sa ilang Amahan. Ang may dalunggan. . . magapatalinghug.

⁵ Si Jesus kana nga nagahatag sa hubad sa maong samingay, Siya Mismo, busa kung ingon niana nasayod na kita kung unsa ang buot ipasabot sa maong hubad. Ug karon samtang atong duolon kini, ang bahin niining pagpugas sa binhi ug—ug ang pagpangani, karon Iya nang ginahubad kini. Ug unya nagatoo ako nga si Jesus nagahisgot niining maong samingay kaniadto sa Iyang adlaw, apan ginapasabot nga mamahitabo kini sa katapusan sa kalibutan, o, sa inigkatapus na sa kapanahonan,

nga mao na *kining* panahona. Ug nagatoo ako nga kining maong teksto karong gabii tukma gayud alang niining panahona nga atong ginapuy-an, tungod kay tin-aw nga giingon ni Jesus dinhi nga “ang paghugpong mamahitabo sa katapusan niining kalibutan,” nga mao kana kon kanus-a mahitabo ang katapusan; ang paghugpong sa trigo, ug ang paghugpong usab sa mga bunglayon ug sa pagsunog kanila, ug sa pagdala na sa trigo pasulod sa Gingharian. Ug nagatoo ako nga ingon niini kini.

⁶ Ug ang usa pa ka Kasulatan nga ginapatoo ako sa ingon niining paagiha, akong nahisulat dinhi, ang Mateo 24:24, kon diin nag-ingon kini nga, nagahisgot mahitungod sa—sa nahimutangan, sa maong binhi sa kasukwahian. Giingon ni Jesus nga mamahimong magkapareho na halos ang maong duha hangtud nga malimbongan niini ang Pinili kon mahimo pa. Halos magkapareho na gayud.

⁷ Ang usa pa ka bahin sa Kasulatan kon diin nahisulat kini, nga ang ulan nagakatagak sa matarung ug sa dili-matarung.

⁸ Mahinumduman ko pa ang una kong kasinatian sa pag-uban ko sa mga tawong Pentecostal. Atua ako kaniadto sa Mishawaka, Indiana. Ug didto ako sa usa ka dakung kumbensiyon, usa ka lawak-tigumanan nga mga susama niini, kon diin nanagtagbo ang mga gikan sa Amihanan ug Habagatan. Tungod niadtong mga adlaw, hinungdan sa maong segregasyon, kinahanglan nga didto sila magtigam. Adunay duha ka dagkung mga grupo kaniadto sa mga kaigsoonang Pentecostal. Wala pa gayud ako nakadungog bahin kanila o nahinagbo man lang sila kaniadto. Mao pa gayuy una kong pagkadungog sa pagsulti og mga dila. Ug didto ako sa tumoy sa lingkuranan, sa maong kumbensiyon . . . Ingon nga dili ako usa ka membro uban kanila, usa lang ako ka batan-on pa nga ministro sa Baptist kaniadto, mao nga naglingkod ako didto gyud sa likod. Ug mahinumdum ko ang unang higayon nga nadungog ko ang tawo nga nagasulti og mga dila, wala gani ko kahibalo kung unsa—bahin sa kung unsa kadto. Ug unya kining duha ka lalaki, ilabina, didto sa atubangan, mosulti og mga dila ang usa ka lalaki ug hubaron sa usa pa ang gisulti sa maong usa. Buweno, bag-o lang ako nagsugod pagtuon sa akong Biblia kutob sa akong mahimo, kaniadto, ug nahibaloan nga uyon kadto sa Kasulatan. Mao gayud kana kon unsa ang giingon sa Kasulatan, nga pagabuhaton sa Balaang Espiritu.

⁹ Buweno, mga usa ka adlaw human niadto . . . Napukaw gyud kaayo ang akong kasingkasing niadtong gabhiona. Didto ako natulog sa kamaisan. Wala nay akong igong kuwarta niadto sa pagpalit og usa—usa—usa ka higdaanan, gani aduna lang ko’y igong kuwarta nga maka-uli, ug nakapalit na ako og donut, mga pila na ka adlaw, o mga rolls, kadto, ug alang sa akong pamahaw. Ug giabiabi akong mokaon uban kanila, apan wala ko’y kuwarta pang-amot. Sa niadtong mga panahona, anaa pa

kaniadto sa depression, 1933, mao nga kaniadto’y—medyo lisod gayud kaniadto. Ug busa nahunahunaan ko, “Buweno, akong . . . Naglikay kong mokaon uban kanila, apan gusto kong masayran kung unsay anaa kanila. Aduna sila’y butang nga wala ako.”

¹⁰ Busa niadtong buntaga ako’y . . . ila akong gihangyo, “Ang tanang ministro moduol dinhi sa entablado ug inyo lang ipaila ang inyong kaugalingon, kung kinsa kamo, kung taga-asa man kamo.”

¹¹ Buweno, ako—ang giingon ko lang, “William Branham, ebangelista, taga-Jeffersonville,” milingkod na. Buweno, niadtong higayona ako ang pinakabatang ministro sa entablado. Ug pagkasunod adlaw ila akong gitawag paadto sa entablado aron sa pagwali. Ug human ko sa pagwali, aba, malipayon kami, ug pagkahuman sugod ko nang nahimamat ang nagkalainlaing mga tawong nagaagda kanako pag-adto sa ilang mga simbahan. Unya pagkahuman nilang . . .

¹² Human niadto, aba, gihunahuna ko, “Kung maadtoan ko lang unta kung asa na kadtong duha ka lalaki nga nagsulti’g mga dila ug ang naghubad!” Kadto ang nagapadilaab sa akong kasingkasing, kinahanglan ko gyud kadto kaayo. Buweno, sa ginaingon ko na sa inyo sa sugod pa, usa ka gamay’ng gasa nga inyong mabira. Kabalo na mo, ang mga gasa ug mga pagtawag dili mabakwi, anaa kini kaninyo sa tibuok ninyong kinabuhi, kita n’yo, nahimugso kamo nga kauban kini, kung gasa kini nga iya sa Dios. Mao nga ako kanunay, sukad pa sa pagkabata, kanunay nang nahitabo kini kanako, ang mga tawo nga nakaila na kanako sa tibuok kong kinabuhi, nasayod silang tinuod kana. Buweno, kung gihunahuna kong . . . wala pa ako kaniadto kahibalo kung unsa kadto, panan-awon ang tawag niini, wala lang gayud ako nahibalo kung unsa kadto. Apan sa hunahuna ko, “Kung maestorya ko lang gayud sila!” Buweno, ug ang espiritu nga atua niadtong gambalay kaniadto mabati mo nga daw sa iya gayud sa Espiritu sa Dios.

¹³ Gani ako—akong naestorya ang usa kanila, ug gipangutana ko siya sa pipila ka mga pangutana, ug usa gayud siya ka tinuod nga Cristohanon. Walay duda bahin niana, kadtong tawhana usa ka tinuod nga magtotoo. Ug ang maong sunod nga tawo, sa dihang nahinabi ko siya, kung nakatagbo man ako og usa ka tigpakaaron-ingnon, usa na kadto kanila. Sa tinuuray kadtong tawhana . . . Ang iyang asawa usa ka babayeng blond ang buhok, ug nagkaaduna siya’y . . . duha ka anak sa usa ka babayeng itum ang buhok. Ug hunahuna nako, “Bueno, unsa na karon? Ania kini, ako—ako’y nalibog na. Usa ako ka pundamentalista; kinahanglan uyon kini sa Pulong, o dili kini husto. Ug ania kanang Espiritu, mitunog ang usa, nga sa kutob kong pagkahisayod, tinuod gayud; ug ang lain namang usa dili gayud maayo; ug parehong nagaabot ang Espiritu

kanilang duha. Karon, unsaon man pagkahitabo niana?” Ako’y, nakapalibog kini kanako.

¹⁴ Duha ka tuig ang milabay, nagaampo ako niadto sulod sa usa ka langub nga akong ginaadtoan sa pag-ampo. Nagkaalikabohon sa maong langub, ug migawas ako usa ka hapon niadto, gibutang ko ang akong Biblia ibabaw sa usa ka troso, ug gihuyop Kini sa hangin og naabli ngadto sa Mga Hebreohanon, sa ika-6 nga kapitulo. Nga nag-ingon, nga sa ulahing mga adlaw, kung unsaon nga mahitabo nga kung mahulog kita gikan sa Kamatuoran ug bag-ohon nato pag-usab ang atong mga kaugalingon ngadto sa paghinulsol, wala nay nahibiling halad alang sa sala, ug unsaon nga kadtong mga sampinit ug mga kadyapa, nga duol na sa pagkasalikway, nga ang katapusan niini mao ang pagkasunog; apan nagakatagak ang ulan sa yuta, kanunay, sa pagbunyag niini, sa pag-atiman niini; apan ang mga sampinit ug mga kadyapa igasalikway, apan ang trigo pagatigumon. Ug gihunahuna ko, “Bueno, nahitabo lang nga hangin kadto ang naghuyup paabli niana.” Bueno, ako na lang gibutang pag-usab ang maong Biblia. Ug nahunahunaan kong, “Bueno, ako na lang karon. . .” Ug ania karon ang hangin ug gihuyop Kini paabli. Nahitabo kadto sa makatulo ka higayon. Ug nahunahunaan kong, “Bueno, hala, talagsaon kana ah.”

¹⁵ Ug unya sa pagtindog ko, ug nahunahunaan kong, “Ginoo, nganong Imo man ablihan kanang Biblia para akong basahon kana, ako. . . sa pag-adto ko dinha, kon diin ‘ang mga sampinit ug mga kadyapa, nga mga nagkaduol na ngadto sa pagkasalikway, nga ang katapusan nila mao ang pagkasunog?’” Nahunahunaan ko, “Nganong, ginaablihan man Nimo kana kanako dinha?” Ug samtang nga ako nagalantaw sa. . .

¹⁶ Karon, nagaabot kining mga panan-awon sa walay pagpaningkamot. Ang Dios lang kana. Kita n’yo? Mitan-aw ako ug nakita ko ang kalibutan nga nagatuyok sa akong atubangan, ug nakita ko nga tibuok nang nadaro na kini. Adunay usa ka lalaking nagsul-ob og maputi, milibot nga nagapugas sa trigo. Ug human nga siya nakalibot na sa kurbada sa kalibutan; miabot ang usa na sab ka lalaki, nga makahahadlok kon tan-awon, nakasul-ob siya og itum, ug ginapanglabayan niya ang tibuok niini og mga bunglayan. Dungan silang nangtubo. Ug sa nangtubo na sila, pareho sila giuhaw, tungod kay nagkinanglan na og ulan. Ug ang matag-usa kanila daw sa nagaampo na kon tan-awon, nga ang gamayn’g ulo niini nakaduko na, “Ginoo, magpaulan Ka na, magpaulan Ka na.” Ug miabot ang dakung dag-um, ug pareho silang giulanan. Sa dihang naulanan na sila, ang gamay’ng trigo milukso ug misugod pag-ingon, “Dalaygon ang Ginoo! Dalaygon ang Ginoo!” Ug ang gamay’ng bunglayan milukso sa maong lugar mismo, ug miingon, “Dalaygon ang Ginoo! Dalaygon ang Ginoo!”

¹⁷ Ug napasabot dayon ang maong panan-awon. Nagakahulog ang ulan sa matarung ug sa dili-matarung. Ang mao rang Espiritu mahimong mokunsad diha sa usa ka tigum, ug magkasadya ang tanan niini: ang mga tigpakaaron-ingnon, mga Cristohanon, ug ang tanan na. Husto gayud. Apan unsa na man kini? Mailhan sila pinaagi sa ilang mga bunga. Kita n'yo? Sa ingon-nianang paagi lamang mailhan kini.

¹⁸ Unya makita mo kana karon, kay ang ihalas nga mga abena, o ihalas nga trigo ug ang lugas mahimong awaton usahay ang usa ka tinuod, kasagaran nga lugas, nga halos pareho na gayud nga limbongan niini ang Pinili. Nagatoo ako nga nagapuyo kita sa usa ka tukma nga kapanahonan, sa dihang kinahanglan na nga kining mga butanga igawali ug pagahisgotan na.

¹⁹ Himatikdi sa bersekulo 41, ang duha usab parehong-pareho kaayo, halos pareho na gayud sa ulahing mga adlaw hangtud nga dili na Niya gibuhang ang . . . Dili Niya mahimong saligan ang usa ka iglesia sa pagpanagbulag kanila, pananglitan, ang Methodist o ang Baptist, o ang mga Pentecostal, sa pagpanagbulag kanila. Ang ingon Niya, “Iyang ginapadala ang Iyang mga manulonda sa pagpanagbulag kanila.” Usa ka manulonda ang magaabot aron ihatud ang pagpanagbulag, ang segregasyon tali sa husto ug sayup. Ug walay usa nga makahimo niana kondili ang Manulonda sa Ginoo. Siya ang maong Usa nga magatug-an kung hain ang husto ug hain ang sayup. Nag-ingon ang Dios nga Iyang ipadala ang Iyang mga manulonda sa ulahing mga panahon. Dili mga manulonda sa mga nangagi na *dinhi*, kondili mga manulonda sa ulahing panahon, ug mao ang mangtigum. Nasayod kita nga mao na kini karon ang nagasingabot nga panahon sa pag-ani. Karon, gipakahulogan nga ang *manulonda* sa tinuoray usa ka “mensahero.” Ug makita nato nga adunay pito ka mga manulonda sa pito ka mga iglesia, ug karon . . . dili, sa mga kapanahonan sa iglesia.

²⁰ Himatikdi kung kinsa kadtong mga magpupugas nga giingon Niya, ug kung unsa usab kadto nga binhi. Una, ang magpupugas maoy Siya, ang Anak sa Dios, Nga miadto sa pagpugas sa Binhi. Ug misunod ang kaaway sa likod Niya, nga mao ang Yawa, ug gipugas ang binhi sa kasukwahian, human sa pagpugas sa hustong Binhi. Karon, mga higala, mao kana ang nahitabo sa matag kapanahonan nga nangagi na sukad pa nga nagkaaduna kita og kalibutan. Mao gayud. Sugod pa gayud sa kinasugdanan, gisugdan na kining maong butang.

²¹ Karon nag-ingon Siya, “Ang Binhi sa Dios, ang Pulong sa Dios.” Miingon si Jesus, sa usa ka dapit, nga “Ang Pulong usa ka Binhi.” Ug ang matag binhi magapamunga ingon sa matang niini. Ug karon kung ang Cristohanon, ang mga anak sa Dios, ang mga anak sa Gingharian nahimong Binhi sa Dios, kung ingon niana sila gayud ang Pulong sa Dios, ang Pulong sa Dios nga napadayag sa maong kapanahonan nga ilang ginapuy-

an, alang sa maong gisaad nga Binhi nianang kapanahonan. Gikahatag sa Dios ang Iyang Pulong sa sinugdanan, ug ang matag kapanahonan nagkaaduna niini tagsa-tagsa ka Binhi, tagsa-tagsa ka panahon, tagsa-tagsa ka saad.

²² Karon, sa dihang miabot si Noe sa esena, ug siya mao ang Binhi sa Dios, ang Pulong sa Dios para niadtong maong kapanahonan.

²³ Sa dihang miabot si Moises, dili siya mahimong moabot nga dala ang mensahe ni Noe, dili kini magpulos, tungod kay siya mao ang Binhi sa Dios niadtong taknaa.

²⁴ Dayon sa dihang miabot na si Cristo, dili Siya mahimong moabot nga dala ang sa kapanahonan ni Noe o ni Moises; Iya nang panahon kadto, alang sa pagsamkon sa usa ka ulay ug maghimugso sa usa ka Anak nga Lalaki, ug nga Siya ang mamahimong Mesiyas.

²⁵ Karon, naagihan na nato ang kapanahonan ni Luther, ang kapanahonan ni Wesley (kapanahonan sa Methodist), ang tanan na niadtong mga kapanahonan, ug ang kapanahonan sa Pentecostal, ug ang matag kapanahonan gikahatagan og saad sa Pulong. Ug ang katawhan niadtong maong kapanahonan, nga mipadayag sa kadtong gikasaad nga Pulong, mao ang Binhi niadtong maong kapanahonan, sumala sa gikaingon na mismo ni Jesus dinhi, “Sila ang mga anak sa Gingharian.” Husto kana. Ang pagpadayag sa Balaang Espiritu nga nagapamuhat pinaagi sa Iyang kaanakan mao kadtong Binhi sa Gingharian niadtong maong kapanahonan.

²⁶ Himatikdi, ang mga bunglayon maoy usa, ang kaaway, si Satanas, nga mao ang nagpugas sa pagpakiglalis, o sa—sa binhi sa kasukwahian, siya mao ang sad-an sa paghimo niining makalilisang nga butang. Gipugas na ni Satanas ang iyang binhi sa sinugdan pa, sa dihang gipahimutang sa Dios ang una Niyang ani sa mga tawo sa ibabaw sa yuta. Si Adan, siyempre, wala pa nasayod nga may usa—usa ka kahibalo mahitungod sa kamatuoran, ug mahitungod sa husto ug sayup, ug wala gayud niya nahikaplagan kana.

²⁷ Apan atong masayran, nga gihatag sa Dios sa Iyang mga anak ang Iyang Pulong alang sa ilang Panagang. Ang ilang. . . Wala na kita’y uban pang Panagang kaysa Pulong sa Dios. Mao kana ang atong Panagang. Walay mga bomba, walay mga silonganan, walay mga dapit tagoanan, walay mga Arizona o California, o kung asa man kini; adunay usa lamang ka Panagang nga aduna kita, ug kana mao ang Pulong. Ug ang Pulong nahimong unod ug mipuyo ipon kanato, nga mao si Cristo Jesus, Siya lang ang atong Panagang. Diha Kaniya, luwas kita.

²⁸ Wala gani ni sala ang pagaisipon ngadto sa usa ka tinuod nga magtotoo. Nasayod ba kamo niana? Siya nga gipanganak sa Dios, dili nagahimo’g pagpakasala, dili siya makasala. Kita n’yo?

Wala gani kini pagaisipa. Aba, nag-ingon si David, “Bulahan ang tawo kinsa dili pag-isipon sa Dios ang iyang sala.” Sa dihang anaa ka na kang Cristo, wala ka nay tinguha sa pagpakasala. “Ang magsisimba, tapus nga mahinloi na sa makausa, wala nay kaisipan sa sala,” dili mo na ginatinguha kini. Karon, sa kalibutan, tingali usa ka pa ka makasasala; apan, sa Dios, ikaw dili na, tungod kay anaa ka na kay Cristo. Unsaon pa man nimo nga mahimong makasasala sa dihang anaa ka na sa Usa nga walay sala, ug ginatan-aw lang sa Dios Siya Kinsay anaa ka na?

²⁹ Karon sa panahon na niining pag-ani. Sa sinugdanan, sa dihang ang Dios nagpugas sa Iyang Binhi sa kalibutan ug gihatag kini sa kasingkasing sa Iyang mga kaanakan, sa Iyang pamilya, aron tumanon kana nga Pulong, mao na kadto ang ilang panalipod, ang pagtuman niana nga Pulong! Ania misulod ang kaaway ug giguba kana nga ali, pinaagi sa pagpugas sa binhi sa kasukwahian, nga supak ngadto sa Pulong sa Dios. Kung kasukwahian na kadto sa sinugdanan pa, mao gihapon karon. Ang bisan unsang butang nga magadugang og bisan unsa ngadto sa Pulong sa Dios, binhi sa kasukwahian sa gihapon! Dili mahinungdanon kanako kung asa pa kini gikan, kung sa organisasyon pa kini gikan, kung sa kasundalohan pa ang gigikanan niini, kung gikan pa man sa politikanhong pangkagamhanan, ang bisan unsa nga supak sa Pulong sa Dios, mao ang binhi sa kasukwahian.

³⁰ Kung motindog ang usa ka tawo ug moingon nga siya’y usa ka magwawali sa Ebanghelyo, ug moingon nga “ang mga adlaw sa milagro milabay na,” kana ang binhi sa sukwahian. Kung ang usa ka tawo motindog ug moingon usa siya ka ministro, usa ka pastor sa usa ka simbaham kung asa man, ug wala siya nagatoo nga si Jesus mao sa gihapon sa matag detalye (gawas sa pisikal nga lawas), mao sa gihapon kagahapon, karon, ug hangtud sa kahangturan, binhi kana sa kasukwahian. Kung moingon siya nga “ang mga milagro ug ang apostolikanhong kapanahonan nangagi na,” binhi kana sa kasukwahian. Kung moingon sila, “Walay ingon nianang butang sama sa Balaanong pagpang-ayo,” binhi kana sa kasukwahian. Ug puno ang kalibutan niini. Ginaduot niini pagawas ug ginatuok ang trigo.

³¹ Atong mahimatikdan nga ang unang magpupugas sa binhi sa kasukwahian maoy gitawag “ang Yawa,” ug nasayod kita nga atua kadto, sa Genesis 1. Atong nahibalalan karon, ug dinhi sa—sa Basahon ni Mateo, sa ika-13 nga kapitulo, nga ginatawag sa gihapon ni Jesus ang bisan unsa man nga sukwahi sa Iyang Pulong ingon nga “mao ang Yawa.” Ug kining 1956, ang bisan unsang butang nga nagapugas og kasukwahian, nga supak sa sinulat nga Pulong sa Dios, o nagahatag og unsa mang kinaugalingong interpretasyon ngadto Niini, maoy binhi sa kasukwahian. Dili kini pasidunggan sa Dios. Dili Niya mahimo. Dili Kini mosagol. Dili gayud. Sama Kini sa binhi sa mustasa;

dili gyud kini mosagol sa bisan unsa pa, dili mo mahimong i-hybrid kini, kinahanglan ang tinuod gayud nga butang. Ang binhi sa kasukwahian!

³² Karon atong makita, nga sa dihang gipugas sa Dios ang Iyang Binhi sa Hardin sa Eden, atong nahibaloan nga namunga kini sa usa ka Abel. Apan sa dihang nagpugas si Satanas sa iyang binhi sa kasukwahian, namunga kini sa usa ka Cain. Ang usa namunga og usa ka matarung; namunga pud ang usa og usa ka dili-matarung. Tungod kay naminaw si Eba ngadto sa pulong sa kasukwahian, nga supak sa Pulong sa Dios, ug nagsugod na dayon ug ligid ang bola sa kasal-anan, ug nagsige na ligid sukad pa niadto. Ug dili gayud nato kini mapahibulag gawas nga moabot na ang mga manulonda ug ipang-lain ang maong butang, ug dalhon na sa Dios ang Iyang mga anak ngadto sa Gingharian, ug pagasunogan na ang mga bunglayon. Himatikdi ang maong duha ka mga tanum.

³³ Kung aduna lang unta og panahon pa bahin niining hisgotanan, apan hisgotan lang nato ang mahinungdanong mga punto, aron nga makaadto na kita sa mga pag-ampo alang sa mga masakiton sa sunod nga mga gutlo.

³⁴ Himatikdi, nanggidungan og tubo ang ilang mga binhi sama gayud sa kung unsa usab ang giingon dinhi sa ika-13 nga kapitulo, sa atong teksto karong gabii, sa Mateo, “Pasagdi nga mangtubo una sila pagdungan.” Karon, miadto si Cain sa yuta sa Nod, nakakita og maasawa para sa iyang kaugalingon, ug gipangasawa; ug gipatay si Abel, ug gipatungha sa Dios si Seth aron puli kaniya. Ug nanagpadayon ang mga kaliwatan, tali sa matarung ug hiwi. Karon, atong hingmatikdan nga nagkatigum-tigum sila, ang matag-usa kanila, sa tagsa ka panahon, ug gikinahanglan sa Dios nga . . . Nahimo nang dautan kini kaayo nga kinahanglan nang laglagon kini sa Dios.

³⁵ Apan nanungha gayud sila sa katapusan sa punto nga ang maong duha ka binhi, ang binhi sa kasukwahian ug ang Binhi sa Dios, nagapatungha na sa ilang tinuod nga mga ulo, ug nahisangko kana kang Judas Iscariote ug kang Jesus Cristo. Kay, Siya mao ang Binhi sa Dios, Siya mao ang sinugdán sa pagpanglalang sa Dios, Siya’y walay lain kundi ang Dios mismo. Ug natawo si Judas Iscariote nga anak sa kalaglagaan, migikan sa impiyerno, mibalik sa impiyerno. Si Jesus Cristo ang Anak sa Dios, ang nagapadayag nga Pulong sa Dios. Si Judas Iscariote, sa iyang kasukwahian, mao ang binhi sa Yawa, miabot sa kalibutan, ug alang sa paglimbong; sama lang kung unsa gayud siya sa sinugdanan, si Cain, ang iyang unang amahan.

³⁶ Nagsimba-simba lang kaniadto si Judas. Dili gayud siya matinuuron. Sa tinud-anay wala gayud siya’y pagtoo; kay kon naa pa wala unta niya gibaligya si Jesus. Apan, kita n’yo, gipugas niya kadtong maong binhi sa kasukwahian. Nagdahum siya

nga makapaghigala siya sa kalibutan, sa mga bahandi, ug nga mahigala usab si Jesus, apan ulahi na kaayo kadto alang kaniya sa pagbuhat og unsa man bahin niini. Sa dihang miabot na ang takdong oras, sa pagbuhat niya niining dautang butang, gilabang na gayud niya ang utlanan tali sa pagpadulong ug sa pagbalik. Kinahanglan na niyang mopaingon sa maong dalanon nga iyang giasoy, ingon nga usa ka limbongan. Nagpugas siya og binhi sa kasukwahian, naninguhang mahimut-an siya sa kadtong dagkung mga organisasyon niadtong adlaw, nga mahiuban sa mga Fariseo ug mga Saduceo. Ug abi niya nga makakuwarta siya sa iyang kaugalingon, ug nga mamahimong inila sa mga tawo. Dili ba mao kana ang nagakahimong hinungdan sa daghang mga tawo nga mahiadto nianang kasukwahian, sa pagpaninguha nga mahimut-an sa tawo! Atong paninguhaon nga mahimut-an sa Dios, dili sa tawo. Apan mao kana kon unsa ang gibuhat ni Judas sa dihang miabot kining mga kasukwahian diha kaniya.

³⁷ Ug nahibalo kita nga si Jesus mao ang Pulong, ang San Juan 1, miingon, “Sa sinugdan mao ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo dinhi ipon kanato.” Kung ingon niana, ang Pulong mao ang Binhi, dayon ang Binhi nahimong unod ug nagpuyo ipon kanato.

³⁸ Kung si Judas binhi sa kaaway ug sa kasukwahian, nahimo kini usab og unod ug nagpuyo ipon kanato sa persona ni Judas Iscariote. Wala gayud siya og tinuod, tinuod nga pagtoo. Aduna siya sa *pagdahum* niya kaniadto og usa ka pagtoo. Adunay ingon nianang butang nga adunay pagtoo; ug usa ka nagapaaron-aroon nga pagtoo.

³⁹ Ug ang usa ka tinuod nga pagtoo nga iya sa Dios motoo sa Dios, ug ang Dios mao ang Pulong, dili gayud kini modugang og bisan unsa man ngadto Niini. Nagaingon ang Biblia kanato nga kon modugang kita og usa ka pulong, o kuhaan og usa ka Pulong, pagataktakon ang atong bahin gikan sa maong Libro sa Kinabuhi, Pinadayag 22:18, ang ulahing naghinapos na nga kapitulo.

⁴⁰ Sa unang kinasugdanan, ang nahaunang Basahon sa Biblia, gisultihan sila sa Dios nga ayaw paglapas og usa ka Pulong Niana, “kinahanglan nga tumanon gayud ang matag Pulong,” kinahanglan nga magkinabuhi sila pinaagi nianang Pulong. Si Jesus, diha sa tunga-tunga na sa maong Libro, miabot ug giingon kana sa Iyang kapanahonan, ug miingon, “Dili lamang sa tinapay mabuhi ang tawo, kondili sa tanan nga Pulong nga—nga nagagula sa baba sa Dios.” Ug sa naghinapos na nga kapanahonan sa Pinadayag, gisulti nang daan ngadto kanato, nga “Ang si bisan kinsa nga magataktak og usa ka Pulong gikan sa maong Libro, o magadugang og usa ka pulong ngadto

Niini, pagataktakon ang iyang bahin gikan sa maong Libro sa Kinabuhi.”

41 Busa wala gayud og butang nga mamahimong mangiubon, ang tinuod lang, nga walay-sambog nga Pulong sa Dios! Mga anak nga lalaki kana sa Dios, mga anak nga babaye sa Dios, nga dili nangatawo pinaagi sa pagbuot sa tawo, o pinaagi sa paglamano sa kamot, o sa kung unsang paagi sa bautismo; kondili nangatawo sila sa Espiritu sa Dios, pinaagi sa Balaang Espiritu, ug ang Pulong nga ginapadayag ang Kaugalingon Niini pinaagi kanila. Kana mao ang mga tinuod nga Binhi sa Dios!

42 Nagapakigsalmot ang kaaway sa iglesia ug mamahimong orthodox kaayo sa kredo o sa kung unsa man. Apan dili kana ang . . . Kasukwahian kana, ang bisan unsang butang nga mohilabut nianang matang sa tinuod nga Kamatuoran sa Pulong sa Dios.

43 Ug unsaon man nato pagkahibalo? Moingon kita, “Bueno, sila, aduna ka ba’y katungod sa paghubad Niini? Wala, sir! Walay tawong may katungod sa paghubad sa Pulong sa Dios. Siya mao ang Iyang Maghuhubad Mismo. Siya ang nagasaad niini, kung ingon-ana Siya ang mobuhat niini, mao na kana ang interpretasyon niini. Sa dihang gisaad Niya Kini, kung ingon-ana Iyang tumanon Kini, mao na kana ang interpretasyon Niini. Ang bisan unsa nga supak sa Pulong sa Dios usa ka kasukwahian! Mao gayud!

44 Karon, sa giingon ko na, walay tinuod nga pagtoo si Judas. Usa ka paaron-aron nga pagtoo ang atua kaniya. Aduna siya’y usa—usa ka pagtoo nga nagdahum siyang mao kadto ang Anak sa Dios, apan wala siya nakaila nga mao gayud kadto ang Anak sa Dios. Dili niya unta kadto nahimo. Ug ang tawo nga mokompromiso niining Pulong sa Dios ingon nga mao ang Kamatuoran, aduna gayud siya’y usa ka paaron-aron nga pagtoo. Ang tinuod nga alagad sa Dios mopabilin nianang maong Pulong.

45 Sa pipila ka nangaging gabii, may usa ka ministro, nga taga-Arizona, nga gikan sa usa ka dakung, bantugan nga eskwelahan dinhi niining siyudad, miduol kanako ug miingon, “Ako—gusto ta kang tul-iron bahin sa usa ka butang,” (ang ingon ko . . .) “sa dihang aduna ka nay higayon.”

Ang ingon ko, “Ang nahibaw-an ko nga kini na ang pinakamaayong kahigayonan. Ngari ka.”

46 Ug busa mianhi siya, miingon siya, “Mister Branham, nagapaninguha kang . . . Nagatoo ako nga matinuuron ikaw ug matinud-anon ka, apan ginapaninguhaan mong ipaila sa kalibutan ang usa ka apostolikanhong Doktrina.” Ug miingon pa, “Human na ang apostolikanhong panahon uban sa mga apostoles.”

47 Ang ingon ko, “Ang unang butang nga ipangutana ko kanimo, igsoon ko, nagatoo ka ba nga dinihogan ang matag Pulong sa Dios?”

Miingon siya, “Oo, sir, nagatoo gyud ko.”

48 Ang ingon ko, “Kung ingon niana, mahimo mo bang ipakita kanako sa Pulong kon diin nga human na ang apostolikanhong panahon? Karon, ipakita kanako kon asa kini, motoo ako kauban nimo.” Ug ingon ko, “Ang tigsulat sa mga apostoles, ang maong usa nga may yawi ngadto sa Gingharian, sa maong adlaw sa Pentecostes sa dihang napaila ang maong apostolikanhong panahon, nag-ingon sila, ‘Mga kalalakihan ug kaigsoonan, unsa man ang among mahimong buhaton aron maluwas?’ Ang ingon niya, ‘Maghinulsol, ang matag usa kaninyo, ug magpabautismo sa Ngalan ni Jesus Cristo, alang sa kapasayloan sa mga sala, ug madawat ninyo ang gasa nga Balaang Espiritu, kay ang saad alang kaninyo ug sa inyong mga anak, ug kanila nga atua sa halayo, bisan ang kapid-an nga pagatawgon sa Ginoo nga atong Dios.’ Karon, unsaon man pagkasumpaki sa Pulong sa Kaugalingon Niini?”

Giingon sa maong tawo, “Gipamugnaw gyud ko karong gabii.”

Ingon ko, “Sa tan-aw ko lagi, pud.” Kita n’yo?

49 Karon ingna ko, nagapanawag pa ba sa gihapon ang Dios? Kung nagapanawag pa sa gihapon ang Dios, nan ang apostolikanhong panahon nagalungtad pa sa gihapon. Sigurado! Kutob sa kadtong pagatawgon sa Ginoo nga atong Dios, kadtong mga ginatawag, kadtong mga tawagon pa, kutob sa ingon ka daghan nga Iyang pagatawgon, mamahimong apostolikanhong panahon pa kini sa gihapon, kay si Jesus Cristo mao sa gihapon kagahapon, karon, ug hangtud sa kahangturan.

50 Karon, atong nahibaloan nga kining kasukwahian napugas na sa matag kapanahonan. Kon mahimo pa nga hisgotan kini sa sunod nga napulo o kinse ka mga minutos, buhaton ko kini, apan dili mo na mahimo. Latas ngadto sa mga kapanahonan... Kitang tanan, halos kitang tanan nagabasa sa Biblia. Ug karon sama sa pag-anhi ni Jesus kaniadto, ug nakaplagan Niya kanang kasukwahian, supak gayud. Siya ang nahipadayag nga Pulong, Siya mao ang interpretasyon sa Pulong, tungod kay nag-ingon Siya, “Susiha ang Mga Kasulatan, kay Kanila nagahunahuna kamo nga diha Kanila may Kinabuhi kamo nga Walay Katapusan, ug kini sila ang nagapanghimatuod mahitungod Kanako.” Tan-awa. Siya—Siya mao ang interpretasyon sa Pulong. Ug ang matag anak nga lalaki ug anak nga babaye sa Dios nga natawo na pag-usab niining kapanahonan maoy interpretasyon sa maong Pulong. Kamo ang mga sulat nga nahasulat, nga mabasa sa mga tawo. Oo.

⁵¹ Himatikdi, nagaingon Siya, “Kawang lamang ang pagsimba nila Kanako, gipaka-Doktrina ang kasukwahian sa ilang pagpanudlo. Kawang ang ilang pagsimba Kanako, ginatudlo ingon nga Doktrina ang kasukwahian, ang doktrina sa tawo, ang mga kredo sa tawo, ginatudlo kana ingon nga Pulong sa Dios, sa dihang wala gyud kini kalambigitan sa Pulong sa Dios.”

⁵² Tan-awa, nagapamunga ang matag kapanahonan sa ingon nianang ani, nahimo kini sa matag kapanahonan, ug ang sa ato dili makahilingkawas niini. Anaa pud kanato ang samang butang, ug mas hilabihan pa nga kapanahonan kini kaysa hiusahon mo pa tanan na nga uban pang kapanahonan, kay kini na ang kaulahian sa kasaysayan sa kalibutan. Kini ang dakung kasukwahian nga miabot gayud sa kalibutan, nga ania na sa ibabaw sa yuta karon. Kasukwahian ang mipahilayo kanila sa matuod ug buhi nga Dios didto sa ubang kapanahonan, ngadto sa mga dios-dios. Ang sa pagkakaran, si Jesus nag-ingon sa Mateo 24:24 nga mamahimong halos magkapareho na gayud kini, nga limbongan niini ang pinaka-pinili kon mahimo pa. Kung hisgotan pa ang mahitungod sa kasukwahian! Oh, maliputan kini kaayo. Anaa sa taliwala sa mga tawo si Satanas, ug ingon gayud ka teologo, ingon nga usa ka Doktor sa Dibinidad, nga mahimong itudlo kanang Pulong nga halos walay sayup. Maoy giingon ni Jesus. Apan bantayi lang siya, magkaaduna gayud kung asa man. Miingon, “Bueno, karon, dili kana alang niini.” Oh, oo, alang kana niini, usab, kita n’yo, tungod kay giingon lagi sa Dios.

⁵³ Tan-awa kung unsay gihimo niini. Kining mao rang kasukwahian ang naghatud sa kapungot sa Dios sa mga adlaw ni Noe, sa dihang gipaadto sa Dios ang Iyang propeta ug miwali sama sa nagadilaab nga kalayo, gi-aghat ang mga tawo sa paghinulsol, ug nalunod ang kasukwahian. Dayon unsa may gibuhat ni Satanas? Misunod dayon, diha kang Ham, ug nagsugod pag-usab sa pagpugas niini. Mao gyud kana ang eksakto.

⁵⁴ Unya miabot si Moises, ang bantugang propeta, aron ihatud ang mga anak sa Israel didto sa kamingawan. Unsay nahitabo? Si Moises, ang bantugan nga propeta sa Dios, mao ang nagdala sa hingpit nga Kamatuoran ngadto kanila, sa gipanghimatud-an nga Kamatuoran. Iyang natagbo ang Dios. Gipamatud-an sa Dios nga iya Siyang natagbo. Kung giunsa nga ang mga tawo kaniadto, kadtong mga sacerdote, ug anaa sila’y ilang mga relihiyon kaniadto, ilang mga rituwal, mga seremonyas ug tanan na, apan mibarug si Moises ingon nga usa ka kapanghimatuuran sa maong interpretasyon sa Pulong. Ayaw kalimti kana! Si Moises ang interpretasyon sa Dios sa Iyang saad. Nag-ingon siya nga buhaton niya kini; siya ang maong interpretasyon sa Dios.

⁵⁵ Unsay nahitabo? Bag-ohay pa nakagawas niadto ang iglesia gikan sa Egipto, pipila pa lang ka adlaw sa iyang panaw, ug

unsay nahitabo? Miabot si Satanas sa iyang kasukwahian sa persona, ang ikaduhang Cain, nga mao si Balaam, ug nagpugas siya og kasukwahian sa ilang taliwala. Nasayod kitang husto kana. Kanang Balaam, ang pagtulon-an ni Balaam, nga “kitang tanan pareho ra, ginaalagaran namo ang mao ra nga Dios nga inyong ginaalagaran,” sa pagka-pundamental, husto siya, tungod kay naghimo siya’g halad nga gihalad sa Dios; pito ka lakeng carnero, pito ka lakeng vaca ibabaw sa pito ka halaran, ug nag-ampo ngadto sa mao ra nga Dios sa ingon ka sama gayud sa gihimo ni Moises didto sa kamingawan, eksaktong pareho gayud. Apan dili sila pareho! Nagapaanino nang daan kanato kung unsay magakahitabo. Atua, na usab, si Cain nga nadayag sa—sa persona ni Balaam. Ug atua pud didto ang Dios nga nadayag sa persona ni Moises, nga nagahubad sa Iyang mga Pulong pinaagi sa usa ka tawo, nga nagapadayag sa Iyang Kaugalingon, sa Iyang saad, pinaagi sa usa ka tawo. Ug mitungha ang kasukwahian.

⁵⁶ Mao sa gihapon ang gibuhat niini sa panahon ni Judas, miabot siya didto nga dala ang iyang kasukwahian.

⁵⁷ Ug, hinumdumi, kining maong kasal-anan nga gitooan niadtong mga tawo, nga “kita pare-pareho lang, usa ra ka Dios ang atong ginasimba, kinahanglan nga mopahisakop kita ngadto sa usa ra ka iglesia, kinahanglan nga usa ra kita ka katawhan,” wala gyud mapasaylo ang Israel tungod nianang salaa! Nag-ingon si Jesus, Mismo, “Nangamatay silang tanan!”

⁵⁸ Nangalaglag sila, ang tanan na gawas sa tulo kanila. Kadto mao ang mga nagpabilin ug mitoo sa saad. Sa dihang ang mahuyang miingon, “Dili nato mahimong kuhaon ang maong guta, malisod kaayo kini alang kanato,” ug uban pa; gipahilum ni Caleb ug Joshua ang mga tawo, ug miingon, “Labi pa natong mahimo nga makuha kini, tungod kay gisaad na kini sa Dios nganhi kanato! Dili ko igsapayan kung unsa man ang kabatok!”

⁵⁹ Ug makawali kita sa gihapon sa Balaanong pagpang-ayo, ug sa bautismo sa Espiritu Santo, ug sa gihapon adunay gahum sa Dios sa pagpalahi kanato palayo sa mga butang sa kalibutan. Maoy giingon sa Dios! Wala gyud mihunong ang apostolikanhong panahon, ug dili gyud kini mohunong, nagapadayon kini.

⁶⁰ Busa, atong makita ang mao ra gihapon nga daan nang magpupugas sa kasukwahian. Ug hinumdumi, wala gyud gipasaylo kana nga sala. Karon, igsoon, kung wala gyud kini napasaylo kaniadto, unsa na man karon sa dihang ang tinuod nga binhi sa tanang kapanahonan nagakatigum na?

⁶¹ Himatikdi kining dakung butang nga gibuhat ni Balaam, nagapadayon kini ug nagapadayon, ug misangko kini sa kaulahian sa pag-abot ni—ni Judas Iscariote, ug ni Jesus. Unsa man kadto? Eksakto gayud nga larawan si Judas ug si Jesus ni

Cain ug Abel. Kay, sama ni Judas nga relihiyoso, mao pud ka relihiyoso si Cain. Mitukod si Cain og halaran, naghimo siya'g halad, nagsimba siya sa Dios, ingon ka matinuuron siya niini sama sa kung unsa ang usa. Apan, nakita n'yo, wala siya'y pinadayag sa kung unsa ang Pulong. Abi niya nga tungod kadto nga nagkaon og pipila ka mansanas o sa kung unsang prutas si Adan ug si Eba. Ug si Cain. . . Si Abel, pinaagi sa pinadayag, nasayod nga sayup kana; kadto'y tungod sa dugo nga maoy nagpahawa kanila, ug naghalad siya og usa ka nating carnero. Ug gipamatud-an sa Dios nga husto ang iyang halad. Nasina siya dayon ug ginapaninguhaan niyang patyon ang iyang igsoon. Ug kung unsa nga gipatay niya ang iyang igsoon ibabaw sa mao rang halaran kon diin namatay ang iyang halad, namatay ang nating carnero ibabaw sa halaran, mao usab nga giluiban ni Judas Iscariote si Jesus Cristo ibabaw sa halaran sa Dios, ug gipatay Siya sama nga gipatay ni Cain si Abel. Tungod kay, si Cain ang binhi sa kasukwahian.

⁶² Ug mao usab si Balaam, ang sinuholan nga propeta, usa ka tawo nga mas nahibalo pa unta. Ug nagpasidaan na ang Dios kaniya pinaagi sa mga ilhanan og mga katingalahan, ug bisan pa ang usa ka mula nga nagapanulti og mga dila, ug padayon siyang miadto sa gihapon. Natawo siya nga mamahimong usa—usa ka magpupugas sa kasukwahian.

⁶³ Ug kung nagsulti nang daan si Jesus niining kapanahonan nga magatapos diha sa usa ka pinakahilabihang kasukwahian nga sukad wala pa, ang kapanahonan sa iglesia sa Laodicea, nga dili mabugnaw og dili usab mainit, nga nagpahigawas Kaniya sa iglesia, unsaon niini nga mahimong uban pa kondili kana mismong kasukwahian! Sigurado, mao gayud. Magatapos kini nianang kapanahonan.

Ug kini mao si Cain ug Abel didto sa Kalbaryo pag-usab.

⁶⁴ Karon himatikdi, pareho gayud, sa pagbiya na mismo ni Jesus, nga mikayab na ngadto sa Langit, gisugo pabalik ang Balaang Espiritu. Mao kadto ang Binhi, ang maong tighatag og Kinabuhi sa Pulong, sama sa gihisgotan na nato kababii. Kini ang Maong nagahatag og kinabuhi sa Pulong. Ang *quicken* nagakahulogan og “paghatud og Kinabuhi.” Ang tinuod nga Balaang Espiritu nagahatud lamang og Kinabuhi sa Pulong nga ingon kung unsa Kini. Dili Kini mohatud og Kinabuhi sa kredo, dili Niini mahimo, tungod kay wala Kini labot sa kredo. Kini mao ang Kinabuhi sa Pulong sa Dios, kay iyaha Kini sa Dios. Kita n'yo? Ug nagahatag Kini og kinabuhi nianang Lawas.

⁶⁵ Karon himatikdi, sama sa ilang gibuhat. Unya, ug nag-ingon ang Biblia, ug—ug si Juan gisultihan niya ang iyang mga anak ug miingon, “Mga anak, inyo nang nadungog ang mahitungod sa anticristo nga magaabot sa kalibutan,” miingon, “nga ania na karon sa kalibutan, ug nagalihok kini sa mga anak

nga dili-masinulondon.” Karon, mga trayenta na ka tuig kadto human sa pag-abot sa Balaang Espiritu. Atong makita, nga sa dihang nagaabot ang Balaang Espiritu, ang tinuod nga Binhi, ang tinuod nga Tighatag og Kinabuhi sa maong Binhi, unya ania na usab nagaabot kana nga kasukwahian. Ug himatikdi, nagpadayon kini. Aduna kini’g. . .

⁶⁶ Napanghimatud-an na ang tinuod nga Pulong, gipanghimatud-an nila kaniadtong mga propeta ang Pulong sa Dios nga mao ang Kamatuoran sa ilang pag-adto didto. Kung may nakabasa na sa Nicaea Council, o sa Pre-Nicaea Council, bahin niadtong kinse ka adlaw sa dugoon nga pamulitika, sa dihang gusto niadtong pundok sa mga Romano didto isulod ug mohimo og denominasyon gikan niadtong maong iglesia. Miabot ang mga propeta, nagsaput og panit sa carnero, nga utan lang ang ginakaon, ug mibarug alang nianang maong Pulong! Apan unsa may nabuhat niini? Kinahanglan nga mamahimo kining sama ni Cain, kinahanglan nga mamahimo kining sama ni Abel, kinahanglan nga mamatay gayud ang usa. Siguradong, mao gayud. Ug nahanaw ang impluwensiya sa Pulong taliwala sa mga tawo, ug ila tanang gipalagpot ang matuod nga Pulong ug gipasulod ang mga dogma sa kasukwahian sa naunang simbahang Katoliko. Nagdugang sila og papa, nagdugang sila og obispo, nagdugang sila *niini*, *niana*, og *uban* pa. Ila nang gitangtang ang tinuod gayud nga kahulogan ni Pedro, ug ni—ni—ni Maria, ug—ug tanan nang uban pa niini; ug nanaghimo na’g mga dios-dios, ug wala nay gihimo kondili ang usa na lang ka paganong seremonya gikan niining gitawag nga Cristohanong relihiyon. Unsa man kini? Binhi sa kasukwahian! Ug nag-organisa, nag-organisa, sa pinakaunang higayon sa kalibutan, og usa ka iglesia. Unsa man kini? Binhi kana sa kasukwahian nga nagsugod pagpugas, butang nga nagadugang, nga nagataktak.

⁶⁷ Kinsa may nakadungog, diha sa Biblia, nga dili mahimong mokaon og karne sa Biyernes? Kinsa may nakadungog, diha sa Biblia, bahin sa kung unsa may pagwisik-wisik imbis ang pagbautismo, sa pagtuslob? Kinsa may nakadungog bahin nianang mga butanga, usa ka “Himaya ka, Maria” o unsa man? Kinsa may nakadungog bahin na niining pipila ka dunot na nga mga binuang nga iyaha sa mga Protestante, usab? Dili mahimong tawgon sa kulon ang kaldero nga grasahon. Husto! Makatarunganon, nga ang nakalapas sa labing diyutay nakalapas sa tanan niini! Kinsa may nakadungog nga nagkaaduna man lang kalabutan ang Dios sa usa ka organisasyon? Ipakita kanako’g usa ka higayon nga may usa ka nag-organisa ug nakapabilin man lang nga buhi. Nangamatay sila dayon, ug wala na gayud nakabangon pa! Panahon na nga adunay butang nga mahitabo, panahon na sa paglihok sa Dios. Gipatay ang maong impluwensiya taliwala sa mga tawo.

68 Gihimo na karon ang mao rang butang. Gipatay nila ang maong impluwensiya, moingon, “Oh, kanang pundok sa mga holy-roller, wala na sila.” Ug, aba, kasukwahian kini! Atubanga ang Pulong sa nawong ug nawong ug tan-awa kung unsa Kini, tan-awa kung ginahubad ba sa Dios ang Iyang Kaugalingong Pulong. Arang ang Dios makapatindog og mga anak kang Abraham niining mga bato. Amen.

69 Sa tuman nga napanghimatud-an na ang Pulong pinaagi kanilang mga naunang Cristohanon, kung giunsa sila sa Dios pagpahilingkawas sa tanan nang butang, ug sa mga balatian, ug aduna sila’y mga propeta, ug nagpanulti sila sa mga dila, nga napanghubad, ug mihatag og mga mensahe nga napamatud-an na nga eksaktong kamatuoran gayud sa matag higayon. Apan sa atubang sa tanan niadtong gipanghimatud-an nga Pulong, gipalagpot Kini sa mga tawo, ug gipili ang usa ka denominasyon. Mao kadto ang inahan sa tanang mga organisasyon.

70 Pareho nang hamtong ang maong duha karon. Nagsugod na usab sila og pagpangunod. Namatay kini, apan midabong usab kini sa mga adlaw ni Luther, ingon nga nahibaloan nato sa naunang mensahe dinhi sa pagpamahaw sa buntag. Midabong kini sa panahon ni Luther. Karon unsa na ma’y gibuhat nila? Human dayon sa pagkamatay niadtong maong dungganon nga tawo, mingtukod sila og organisasyon.

71 Milambo kini. Ug usab sa mga adlaw ni John Wesley, sa dihang kadtong mga Anglicano, gigapos kini pinaagi sa ilang mga walay-katapusang kasiguradohan ug tanan na hangtud sa punto nga halos daw sa unibersalismo na, ug unsa may nahitabo? Mipatungha ang Dios og usa ka tawo nga gihinganlan’g John Wesley, ug gipatay niya ang maong tibuok butang. Ug wala madugay human siyang namatay, siya ug si Asbury ug sila, unsay nahitabo? Nag-organisa sila, ug karon anaa na kaninyo ang tanan nang klase sa mga Methodist. Dayon may miabot nga usa o uban pa, si Alexander Campbell, si John Smith, ug unsa pa man.

72 Sa katapusan, misiak ang Pentecostal, nga gikan sa tanan niini. Unsa may nahitabo dayon? Maayo na ilang padagan, unsa man ang nagpababag kaninyo? Nangbalik na usab kamo sa mao rang lapok nga inyong gibiyaaan, mibalik sa mismong mao rang lunangan, mibalik sa kasukwahian ug sa pagtukod og mga organisasyon, kinahanglan mong mokompromiso sa Pulong. Ug sa matag higayon nga mopadala na ang Dios og butang nga bag-o, dili mo na kini madawat. Husto kana! Kasukwahian na usab! Ug, himatikdi, sa gikaingon ko na sa miaging adlaw, kadtong unang gamay’ng tipaka nga migitib gikan niining maong gamut, misaka ngadto sa mga dahon ug paadto sa uhay, dayon ngadto na usab sa lindog, ug mitubo. Kadtong tipaka sa trigo halos mora og ang lugas na mismo kon tan-awon, ug abi nato nga kini mao na gayud, apan kon ablihan mo kini, wala man lang og lugas

dinha. Usa ra kini ka tig-suporta para tuboan sa maong lugas, ug mamatay pud kini, ug ang maong kinabuhi mogawas gikan niini ug moadto sa lugas. Himatikdi, gani ilang ginatawag ang kasimbahanan nga nagpugas og. . .

⁷³ Atong makita karon nga ang atong giingon nga mga kaiglesiahanan, bisan ngadto sa atong mga Pentecostal, nanggawas kita, dili kita makuntento, kinahanglan natong motukod og kaugalingon natong mga grupo-grupo. Tanan na nangtungha, kinahanglan aduna kita *niini*, kinahanglan nga aduna kita *niini*, kinahanglan nga aduna kita’y laing grupo. Ug mitindog kining tawhana, miingon, “Moabot Siya sa maputi nga panganod.” Moingon ang usa, “Uh-huh, moabot Siya nga sakay sa usa ka maputi nga kabayo.” “Sige, magbuhat kita og duha ka grupo.” Kita n’yo, unsa kini? Pagpugas sa kasukwahian! Sa dihang moabot Siya, bisan sa unsa pa kini, Siya maoy mohubad sa Iyang Kaugalingong Pulong sa pag-abot na Niya. Maghulat kita hangtud sa pag-abot nianang orasa. Kuhaa ang. . . Sa paghisgot bahin niana, dili gani ninyo makuha ang takdong Mensahe sa panahon. Kanunay ginapunting ang kung unsay pagabuhaton sa Dios, o kung unsa ang nabuhat na Niya, ug wala ginapanumbaling kung unsa ang Iyang ginabuhat karon. Sa ingon niana kita nagakaaduna og kasukwahian niini.

⁷⁴ Ato karon mahimatikdan nga ang atong kaiglesiahanan, ang tanan—tanan sa atong kaiglesiahanan nangpugas sa hangin, ug ginaani na ang alimpulos. Wala nay atong mga tigum sa pag-ampo, wala na kita’y mga panerbisyo nga ato sa unang naandan. Unsa na ma’y nahitabo? Ato nang napaubos ang mga sukaranan sa tanan na. Tan-awa, bisan na sa atong mga kaiglesiahananang Pentecostal, puno na og mga kababayan-an nga mugbo’g buhok. Dili kana sa una mahimong tugotan. Pinintalang mga nawong, may kutiks ang mga koko, tanan nang klaseng butang; lalaki dinhi nga may. . . nga daw mga Rickies ug uban pa; nanggiminyo na sa makatulo o makaupat ka higayon, ug mga diyakono; oh, unsang kasukwahian! Kahugawan kini! Ginaunsa man nila pagbuhat niini? Dili gusto sa Dios kini sulod sa Iyang Iglesia, kinahanglan modangop sila ngadto sa usa ka organisasyon aron makasulod niini. Mahadlok mosulti ang usa ka tawo bahin niini, kay pagasipaon man sila pagawas sa maong organisasyon. Dios, hatagi kami’g kalalaken-an nga walay kahalimbigitan sa bisan unsa pa man kundi sa Dios ug sa Iyang Pulong, nga magatug-an sa Kamatuoran bahin niini. Kana mao ang eksaktong gikinahanglan nato. Unsa may atong gibuhat? Nagpugas og kasukwahian. Nangpugas kita sa mga hangin, ug ato na karon ginaani ang alimpulos.

⁷⁵ Himatikdi nga ginapangtigum na sila karon alang sa pagsunog. Nahimatikdan ba ninyo, nag-ingon si Jesus, “Una, bangana silang tanan, hugpunga sila sa pinungpong, ug ipamatang ang maong mga pinungpong diha sa usa ka

pagkamada, ug Ako silang pagasunogon.” Adunay dinagmay nga pinungpong nga gitawag Methodist, Baptist, Presbyterian, Lutheran, nagakahugpong na silang tanan diha sa World Council of Churches. Unsa man kini? “Panghugponga una sila!” Alleluyah! Nahimatikdan ba ninyo, ginahugpong Niya una ang mga bunglayon, ginatigum sila pahilayo sa trigo, ginalain sila, “Hugponga silang tanan ug sunoga sila.” Pagasunogon silang tanan sa mga paghukom sa Dios, tungod sa pagpamugas og kasukwahian sa mga tawo, mga butang nga ilang... Adunay dagway sa pagkadiosnon, ug ginapanghimakak ang Gahum niini, ginapanghimakak ang Pulong, aron lang ipatigbabaw ang kung unsang relihiyosong mga tulumanon, sa kung unsang dogma nga gidugang sa kung kinsa man, gipaninguhaan isagol sa Pulong sa Dios. Dili kini magpulos. Usa kini ka kasukwahian.

⁷⁶ Nagasinggit ako karon, sama kaniadto, sa bantugang propeta sa kaniadtong panahon, si Amos, sa paglugsong niya niadtong siyudad, miingon, “Dili ako propeta, ni usa ka anak sa propeta. Apan kung mongulob na ang leon, kinsa man ang dili mahadlok!” Miingon siya, “Kung namulong na ang Dios, kinsay makahimo nga dili motagna.” Iya nang gisulti daan ang paghukom alang niadtong henerasyon, miingon, “Ang mismong Dios nga iyong ginaangkon nga inyong ginaalagaran maoy molaglag kaninyo.”

⁷⁷ Timan-i ninyo kini, ania kini sa teyp, ug hinumdumi ninyo. Ang mismong Dios nga... Kining maong mga tawo karon nagakatigum na tanan niining daku og halapad nga anihonon sa—sa World Council of Churches, ug kinahanglan kang mosulod gayud ngadto niini. Dili ka makapabilin sa gawas niini. Mahimo kamong sa tagsatagsa mogawas niini, o mosulod ka gayud niini. Dili mahimong magkaadunay anaa sa tungatunga. Mamahimo na kini ang marka sa maong mapintas nga mananap. Wala nay makapalit o makabaligya, gawas kaniya nga adunay marka, o nagkaaduna og maong kasukwahian. Karon, pagpahilayo kamo niini! Panggawas kamo niini! Kalagiw kamo niini! Pahilayo kamo gikan niini! Ang mismong Dios nga ilang ginaangkon nga ilang ginaalagaran maoy magalaglag kanila. Ang maong gamhanang Dios sa gugma nga dili... .

Miingon, “Bueno, nag-ingon man si Jesus nga kinahanglan magkahiusa kitang tanan.”

⁷⁸ Kung ingon niana nag-ingon pud Siya, “Unsaon ninyong magakakuyog, magakakuyog ang duruha, gawas kon sila magakauyon?” Ingon Niya “usa ra,” sama Kaniya ug ang Amahan Usa ra. Ug ang Amahan mao ang Pulong, ug Siya mao ang nadayag nga Pulong. Siya’y “Usa ra” sa Amahan, tungod kay Siya ang pagkapinadayag sa gisaad nga Pulong sa Dios. Ug mao pud kini karon, o sa unsa man nga kapanahonan. Oo, sir. Ang Dios Usa ra. Gusto Niya nga mahiusa kita.

⁷⁹ Unsaon man pagkahimong usa *kini*, ginapanghimakak *niini* ang pagpakatawo pinaagi sa ulay, ug dili na man ang *kini*, ginapanghimakak ang Balaanong pagpang-ayo, ug *kini*, *kana*, anaa na silang tanan sa usa ka kagubot sama niana? Ang uban gani kanila wala gani nagatoo sa Dios, nga nagatoo nga Anak Siya sa Dios; nga nagatoo nga Anak Siya ni Jose, nga *gitawag* nga Anak sa Dios. Sigurado. Ang kaluhang igsoon sa mga Lutheran, mga Zwingli, nagatoo niana, nga bug-os Siyang usa gayud ka maayong tawo. Ang Christian Science na man nag-ingon nga usa Siya ka propeta, usa ka yanong tawo, dili Siya Dios. Aba, kung dili pa Siya Dios, Siya na ang pinakadakung manglilimbong nga nagkaaduna ang kalibutan. Dios gayud Siya o wala Siya’y pulos. Dios Siya! Siya ang Dios, Mismo, nga nahimong unod sa taliwala kanato, sa persona sa Anak sa Dios. Sigurado, mao kana kung unsa Siya.

⁸⁰ Karon makita nato nga misulod na ang kasukwahian. Nasayod kita nga ania na kini dinhi, walay makalimod niini. Oh, sus! Timan-i lang. Iyang pagalaglagon kanang pundok nga nagaangkon nga sila nagapangalagad sa Dios. Bantayi ninyo kini.

⁸¹ Gitanum sa Dios ang Iyang Binhi. Pahuman na ako, kay panahon na aron sugdan ang maong linya sa pagpaampo. Gitanum sa Dios ang Iyang Binhi, ug ang Iyang Binhi mao si Cristo. Magawali ako bahin niana sulod sa pipila ka gabii, kon diin gidesisyonan sa Dios nga ibutang ang Iyang Ngalan, kon itugot sa Ginoo, diha sa usa sa mga pagpamahaw tingali sa dihang aduna ko’y medyo taastaas nga panahon. Tan-awa, Siya lang ang Dalan nga makalingkawas. Siya lang ang matuod nga Manggagahum. Siya lang ang matuod nga Dios, wala nay uban pa gawas Kaniya. “Ako mao ang Dios, ug ang nag-inusarang Dios,” ang ingon Niya. Nag-ingon si Jesus, “Kini mao ang sugo: Patalinghugi, O Israel, Ako ang Ginoo nga inyong Dios, ang usa ra nga Dios. Ako mao Siya. Nganong mangita pa mo og lain? Adunay lain moabot. . . Mianhi Ako sa Ngalan sa Akong Amahan, ug wala Ako ninyo dawata. Apan adunay lain nga moanhi sa iyang kaugalingon nga ngalan, ug inyo hinoon siyang dawaton.” Ug gibuhat nila kini didto sa Nicaea.

“Usa ka ba ka Cristohanon?”

“Baptist ako.”

“Usa ka ba ka Cristohanon?”

“Pentecostal ako.”

“Usa ka ba ka Cristohanon?”

“Methodist ako,” lain nga ngalan.

⁸² Apan kung bahin na nianang maong Ngalan ni “Jesus Cristo,” manglakaw sila palayo gikan Niini kutob sa ilang mahimo, ayaw nilang may kalambigitan sila Niini, kay Siya mao

ang Pulong ug ginapahayag sa Pulong ang Kaugalingon Mismo Niini. Timan-i, ang maong bugtong Dalan nga makalingkawas! Siya ang Rosa sa Saron, ang Biblia nag-ingon nga mao Siya. Ang matag titulo (sa Biblia) sa Dios iya ni Jesus Cristo. Siya ang Alfa, Omega, ang Sinugdanan ug ang Katapusan; Siya nga mao ang Kaniadto, nga mao ang Karon, ug ang Umalabut; ang Gamut ug ang Kaliwat ni David, parehong Gamut ug Kaliwat ni David; ang maong Bitoon sa Kabuntagon, ang Rosa sa Saron, ang Lirio sa Kawalogan, ang Alfa, Omega, Amahan, Anak, Espiritu Santo, ang tanan niini anaa kang Jesus Cristo! Siya mao ang kapadayagan ni Jehovah nga Dios nga nahimong unod aron mopuyo uban kanato. Eksakto kung unsa gayud Siya.

⁸³ Siya ang Rosa sa Saron. Unsa may ilang gibuhay sa Rosa sa Saron? Ila Kining gikumot, gidugmok kini, aron mapuga ang pahumut gikan Niini. Kinahanglan nga pugaon ang matahum nga rosa aron nga makuha ang pahumut gikan sa maong rosa. Usa kadto ka matahum nga Kinabuhi, wala pa gayud kinabuhi nga nabuhi sama Niini, apan gikinahanglan Kini nga mapuga didto sa Kalbaryo.

⁸⁴ Kita n'yo, ilang gikuha ang—ang igdidihog nga Rosa sa Saron ug gibutang kini diha kang Aaron, kinahanglan nga dinihogan siya pinaagi niana alang sa pagsulod sa atubangan sa Ginoo didto sa balaang dapit, sa balaang tabil. Kinahanglan siya'y dinihogan sa Rosa sa Saron, sa pagsulod aron sabligan ang halaran-sa-pagpasig-uli matag tuig. Ug ang ingon nianang dihog kinahanglan anaa kaniya, usa ka matam-is nga kahumot ngadto sa Ginoo, nga dala ang dugo sa cordero sa iyang atubangan, human nga nasabligan na usab siya sa dugo sa maong cordero. Mga granada ug mga campanilla ang nakapalibut sa iyang mga bisti, kinahanglan molakaw siya diha sa usa ka matang sa paglakaw, nagatugtug “balaan, balaan, balaan ngadto sa Ginoo.”

⁸⁵ Himatikdi, Siya kadtong maong Rosa sa Saron, kadtong maong matam-is nga Kahumot, ang Dihog diha sa Iyang katawhan. Dili ka mahimong moduol sa Iyang atubangan nga dala ang bisan unsa nga kredo, bisan unsa pang butang, kondili dinihogan gayud pinaagi nianang maong Rosa sa Saron, ang Pulong. Siya usab ang Lirio sa Kawalogan.

⁸⁶ Karon, unsaon mo man pagkuha sa opium? Makuha mo ang opium kung mokuha ka og lirio ug pugaon kini, makuha mo na ang opium. Nagagamit ang doktor niini sa ilang laboratoryo. Pananglitan ang usa ka tawo nga nerbiyoso ug makuraton, o usa ka babaye, gibati sa maong babaye nga mabuang na gayud siya, nagalakaw-lakaw siya sa salog ug nagasiyagit, nagsige siya'g singgita, mokuha lang ang doktor og gamay diha sa iyang liriong opium ug iindyeksyon kini sa iyang bukton o asa man nga ugat, o diha sa lalaki, ug mokalma na sila. Moundang kini tanan sa kadali. Apan dihadiha nga mohupas na ang epekto nianang

opium, ania mobalik na usab sila, mas nagsamot pa kaysa kung unsa sila sa una.

⁸⁷ Apan sultihan ko kamo, mga higala, usa lang kana ka tipo sa tinuod nga Opium nga nagagikan sa Lirio sa Kawalogan nga nasayran ko. Siya mao ang Lirio sa Kawalogan. Gipuga Siya gikan sa Kalbaryo. Gisamaran Siya tungod sa atong mga kalapasan, pinaagi sa Iyang mga labod kita nangaayo. Diha niana, kadtong pagpuga gikan sa maong mga bulak, usa Siya ka Bulak. Siya ang pinakamatahum nga Bulak nga sukad mitubo, mao kining Lirio sa Kawalogan, ug kining bantugan nga Rosa sa Saron. Niining gabii anaa Siya sa ibabaw karon, nagkaylap taliwala sa Kalangitan ug sa yuta, sa pagtoo ko, Siya niadtong panahona, diay, aron—aron kuhaon ang sala sa kalibutan ug aron ihatud ang pagpang-ayo balik sa kalibutan. Ug nag-ingon ang Biblia nga Siya mao sa gihapon kagahapon, karon, ug hangtud sa kahangturan.

⁸⁸ Higala, sa dihang giingnan sa Dios si Moises, didto sa kamingawan, nga maoy usa—usa ka tipo Kaniya, nga ipataas ang usa ka bitin nga tumbaga. Ug ang tumbaga nagarepresentar sa gihukman nga sala, ang bitin nagarepresentar, nagarepresentar ang *tumbaga nga bitin* “sa sala nga gihukman na.” Isip, ang *tumbaga* maoy “paghukom sa Dios,” sama sa tumbagang halaran kon diin ginapahimutang ang mga halad. Ug si Elias usab mihangad ug nag-ingon nga daw sa tumbaga ang kalangitan, ang maong paghukom sa Dios ngadto sa usa ka wala-nagatoo nga nasud nga mitalikod sa Dios. Nagarepresentar ang tumbaga og paghukom, paghukom sa Dios. Ug nagrepresentar ang bitin sa sala nga gihukman na; ug si Jesus mao kadto ang bitin nga nahimong sala alang kanato, ug giangkong ang mga paghukom sa Dios diha Kaniya. Gisamaran Siya tungod sa atong mga kalapasan, napangos tungod sa atong kasal-anan, ang silot sa atong pakigdait diha ibabaw Niya, ug pinaagi sa Iyang mga labod nangaayo kita.

⁸⁹ Oh, gipapuno og Opium sa Dios ang Iyang aparador, karong gabii, alang kanimo. Higalang Cristohanon, masakiton ka ug nagaantus. Oh, gibudlayan ka na, tumang ka lisod na kini alang kanimo. Dili mo na kini maantus pa, ikaw—nagasalimuang ka na niining modernong panahon nga atong gikapuy-an.

⁹⁰ Nadunggan n’yo ba ang *Life Line* karong gabii, nga kung unsay giingon nila, nga—nga nagaingon ang Rusya, sa ’55, nga ilang “bug-os nang kontrolon ang tibuok kalibutan”? Sa dili pa mahitabo kana, kinahanglang moabot na ang Pagsakgaw. Busa unsa na kaha kaduol kini, higala? Haduol na gayud kini karon.

⁹¹ Dili ba nimo Siya pangitaon karong gabii sa tibuok mong kasingkasing? Siya ang Lirio sa Kawalogan, ug mao Siya sa gihapon kagahapon, karon, ug hangtud sa kahangturan. Ania Siya dinhi karong gabii aron ibayaw ang Iyang Kaugalingon

taliwala sa iyang katawhan, sama lang nga gibayaw ni Moises ang—ang maong timailhan sa sala, nga gihukman na. Ug dili lang sala, kondili balatian pud. Hinumdumi, giingon ni Jesus, “Maingon nga giisa ni Moises ang tumbaga nga bitin, maingon man usab kinahanglan igaisa ang Anak sa tawo.” Alang man sa unsa kini giisa ni Moises? Alang sa sala, sa pagkawalay-pagtoo, ug alang sa balatian. Giisa si Jesus, usab, alang sa sala, balatian, ug sa pagkawalay-pagtoo. Siya ang mao rang butang.

⁹² Karon, niining gabii, sa mga adlaw nga ania na kanato kining dakung kasukwahian, nagsaad si Jesus diha sa Lucas, nga sa mga adlaw sa . . . sa wala pa ang Pag-abot sa Ginoo, mamahimo kining sama sa mga adlaw sa Sodoma, ug sa dihang igapadayag na sa Anak sa tawo ang Iyang Kaugalingon, sama niadtong gipadayag sa Anak sa tawo ang Iyang Kaugalingon ngadto kang Abraham didto; si Elohim, ang Dios, nga nahimong unod sa taliwala sa mga tawo, ug mipabilin didto kay Abraham ug gipakita kaniya, gisultihan siya kung unsa niadto ang ginahunahuna ni Sarah (nga naglingkod sa likod Niya) sulod sa balongbalong, nga wala pa gayud Niya nakita. Gisultihan siya kung unsay iyang . . . Ug gisulti ang iyang ngalan, “Sarah.” “Abraham,” dili iyang—dili ang ngalan niya nga Abram, nga nasugdan na niya, kondili Abraham. Dili Sarai, S-a-r-a-i; kondili S-a-r-a-h, “Hain ba ang imong asawa, si Sarah?”

Miingon, “Anaa siya sa balongbalong sa Imong likod.”

⁹³ Nag-ingon, “Pagaduawon Ko kamo sumala sa panahon sa kinabuhi.” Ug mikatawa siya. Nag-ingon Siya, “Nganong mikatawa man siya?”

⁹⁴ Karon, nag-ingon si Jesus, “Sa dili pa matapok ug masunog kining dakung kasukwahian, nga igapadayag sa Anak sa tawo ang Iyang Kaugalingon sa mao gihapong paagi nga Iyang gibuhat kaniadto.” Ug kanay . . . Unsa man kini? Usa kini ka pag-isa, na usab, sa inyong atubangan, nga si Jesus Cristo mao sa gihapon kagahapon, karon, ug hangtud sa kahangturan. Ginatoohan ba ninyo kini? Atong iduko ang atong mga ulo kung ingon-ana alang sa pag-ampo.

⁹⁵ Minahal nga Dios, gihigugma Ka namo. Ang Imong Pulong maoy pinaka—pinaka Pagkaon namo, Ginoo. Gusto gayud namo Kini! Nabuhi kami pinaagi Niini, Ginoo. Daw sa ang among kapasidad dili gayud matagbaw. Gusto gayud namo nga molingkod sa Imong lamesa, palibot sa Imong Pulong, ug magkalipay sa maong mga panalangin, Ginoo, sa dihang nagakatigum kami sama niini, nga mga igsoong lalaki ug igsoong babaye kinsa nga mga napalit na sa Dugo sa Anak sa Dios, nga maoy gipalit na sa Imong Dugo. Ug mianhi kami dinhi karong gabii, Ginoo, among gigahin kining mga gabii alang sa pagpang-ampo sa masakiton. Ug sumala sa Kasulatan, nag-ingon Ka nga “pinaagi sa maong mga labod nangaayo na kami.” Dili na

kinahanglan nga ampoan pa kung ingon-ana (igatug-an lang ang among mga kasal-anan), kay pinaagi sa Imong mga labod kami nangaayo (human na) na gayud. Oh, daw sa unsa nga adlaw sa kaluwasan! Daw sa unsang—unsang saad ni Emmanuel! Nga Kamatuoran gayud Kini.

⁹⁶ Nag-ingon Ka, “Sa hamubo na lang nga panahon, ug unya ang kalibutan dili na makakita Kanako, apan kamo makakita ra unya Kanako, tungod kay Ako” (ang pang-personal nga pulingalan nga “Ako”) “Ako magauban kaninyo, bisan sa sulod ninyo, hangtud sa katapusan sa kalibutan.” Ug sa diha na sa kaulahian sa panahon, niining dakung pagtibawas, nag-ingon Ka, nga sa dili pa kini mahitabo, mamahimong sama gayud kini sa wala pa nangahulog ang kalayo sa Sodoma ug gisunog ang kalibutan sa Gentil, nga magaabot pag-usab ang pagpadayag sa Anak sa tawo sama sa nahitabo kaniadto sa Sodoma. Amahan, dili unta masipyat ang mga tawo niini.

⁹⁷ Ug ako nagaampo, Dios, ingon nga medyo binagis nga butang, (kung nasayup man ako pagsulti, pasayloa ako), sa pagbinggansa. Gimahal ko sila, Ginoo. Ako-akong ginaampo nga dili sila mosipyat niini. Tugoti nga mamahimo kining usa sa mga dakung gabii, Ginoo. Hinaut nga ang mga masakiton, mga nag-antus, mga buta, ang bisan unsa pa man nga ania dinhi, Ginoo, mamaayo na karong gabii. Hinaut nga ang matag usa nga makasasala maluwas. Diha mismo sa ilang mga kasingkasing karon, kung sila’y dili-magtotoo, ug hinaut nga dawaton nila si Cristo niining taknaa. Itugot kini, Amahan. Anaa na kini sa Imong mga kamot. Among ginatugyan Kanimo ang among mga kaugalingon, nga makitang nagaanhi Ka sa among taliwala.

⁹⁸ Ug nag-ingon Ka, sa San Juan 14:12, “Ang nagatoo Kanako, magahimo usab sa mga buhat nga Akong ginabuhat.” Daw sa unsa namong pagkasayod nga Imo nang napaila ang Imong Kaugalingon ngadto sa mga tawo, tungod kay Ikaw kadtong motungha nga Propeta nga giingon ni Moises. Dili sila nagkaaduna og mga propeta sa ginatus na nga mga katuigan, mikaylap na ang kasukwahian, apan ang Pulong sa Dios kinahanglan nga matuman sa gihapon; busa ang Pulong nahimong unod, ug mao pud ang kasukwahian. Ug, Amahan, amo na usab makita kini sa pagkaron, ang kasukwahian nga nagakahimo na nga usa ka daku kaayong pungpong; ug nakita namo ang Pulong nga nagakaingon usab. Panalangini kami karong gabii, Amahan. Among ginatugyan ang among mga kaugalingon nganha Kanimo, sa Imong Pulong. Bisan unsa man ang gikinahanglan Mong ipabuhat kanamo, buhata pinaagi kanamo, Ginoo. Sa Ngalan ni Jesus. Amen.

⁹⁹ [Usa ka igsoong babaye nagasulti sa laing dila. Blangko nga bahin sa teyp—Ed.] Wala kita kahibalo kung unsay Iyang giingon. Gusto Niya tingaling sultihan kita og usa ka butang, mao nga magmatinahuron gyud kita sa makadiyut lang.

[Blangko nga bahin sa teyp. Ginahatag sa usa ka igsoong lalaki ang hubad—Ed.]

¹⁰⁰ Amen. Nakabasa ba kamo [Blangko nga bahin sa teyp—Ed.] sa Kasulatan nga diin sa nagasingabot na ang kaaway, ug nagkatigum silang tanan, ug ilang...ingon sa usa ka makusganon nga puwersa ang ilang kaaway. Ug miabot ang Espiritu sa Dios diha sa usa ka lalaki, ug gisultihan siya, ug nagpropesiya siya, ug giingnan kon diin nila adtoan ug atangan, ug ilang gipapas ang ilang kaaway. Ania na usab kini. Kana'y dapit sa pagpapas sa inyong kaaway, kita n'yo, gamita ang kamot sa Dios. Ang kamot sa Dios mao si Cristo, siyempre, ang Pulong, busa ibutang Kana sa inyong mga kasingkasing karong gabii samtang tawgon na nato ang linya sa pagpaampo.

¹⁰¹ Nagtoo ako nga nanghatag na usab si Billy og mga prayer card karong adlaw. B, mga B, kuhaon nato ang B, otsentay-singko. Kagabii, kagabii nagkaaduna kami og kinse. Nagakuha kita kasagaran og mga kinse sa matag gabii. Ug kupti unya ang inyong mga kard, matagad nato sila, karon. Paninguhaon nato sa mga kinse. Numero otsentay-singko. B, ingon nga Branham, kabalo na mo. B, otsentay-singko ngadto sa usa ka gatus. Ug atong...Tan-awon nato, kinsa ang may B, otsentay-singko, ipataas ang inyong kamot. Sigurado kang... Oh, sa likod, sige, anhi ka dinhi otsentay-singko.

¹⁰² Karon, ang akong bata...Nga tingaling may mga estranyo dinhi, nga wala nasayod kung ginaunsa paghimo niini. Nagaanhi ang akong anak nga lalaki dinhi, o kinsa man; kung dili man siya makaanhi, si Igsoong Borders, uban pa man. May tawong moanhi, ug kuhaon kining mga kard, mga usa ka gatus kini, ug diha sa atubangan sa mga tawo ug ila kining tanan pangsagulon. Busa sa paghatag niya kanimo sa kard, dili siya makaingon kanimo nga makasaka gayud ka dinhi sa entablado, dili niya mahibaloan kana. Ug bisan ako dili makahibalo. Moanhi ako sa gabii, mokuha lang og mga napulo o kinse, dinha, sa mga kard. Wala man kana kahilambigitan sa imong pag-ayo. Mahimong molingkod ka mismo dinha. Tan-awa, kagabii. Pila man ang ania dinhi kagabii, patan-aw sa inyong kamot? Kung giunsa nga nangaayo gayud ang mga tawo sa kinatibuk-an sa maong tigum!

¹⁰³ Karon, otsentay-singko na kadto, otsentay-sais, otsentay-siete, otsentay-otso, otsentay-nuwebe, nobenta. Paanhion na nato sila mismo karon. B, otsentay-singko, otsentay-sais, otsentay-siete, otsentay-otso, otsentay-nuwebe, nobenta. Usa na unta kana ka...Sigurado, kinahanglan natong...Ug kung aduna ma'y...Ania ang usa pa, oo, kumpleto na kini. Nobenta, nobenta ngadto sa usa ka gatus na karon. Nobenta, nobentay-uno, nobentay-dos, nobentay-tres, nobentay-kuwatro, nobentay-singko, nobentay-sais, nobentay-siete, nobentay-otso,-nuwebe.

104 Kung dili ka makalihok, kung ikaw . . . Nakita kong aduna kita'y duha ka, tulo ka mga wheelchair dinhi karon, upat sila, ang pagtoo ko, kita ko na. Kung aduna ka'y prayer card, nga—nga ang imong numero gitawag na, ug dili makalihok, itaas lang ang imong kamot, ipasaka nato kana dinhi.

105 Ug kung wala gyud ka'y prayer card, maglingkod ka lang dinha ug mag-ampo, ug ingna, “Ginoong Jesus, tugoti—tugoti—tugoti nga ako na kini karong gabii.” Pila man ang ania dinhi nga wala'y prayer card, itaas ang inyong kamot. Oh, sus! Sige, ingon niini lang ang atong isulti, naglaum ko nga dili kini daw sa mapasipad-on. Apan adunay usa ka gamay'ng babaye usa niana ka higayon nga walay prayer card, kung ingnon lang nato. Miadto siya og nakigdutdot sa kadaghanan, miingon siya (karon paminaw og maayo), “Kung makahikap lang ako nianang sapot sa maong Tawo, mamaayo na gayud ako.” Pila man ang nahibalo na sa maong estorya? Bueno. Ug unsa may iyang gibuhat? Iya Siyang gihikap, ug mihawa ug milingkod. Ug milingi si Jesus, nahibalo Siya kung asa siya dapit. Husto ba kana? Nasayod Siya kung unsay iyang sakit. Husto ba kana? Nasayod Siya kung unsay iyang sakit, mao nga giingnan Niya siya kung unsay iyang sakit. Ug iyang gibati sa iyang lawas nga miundang na ang talinugo. Husto ba kana? Tungod kay ngano man? Iya Siyang nahikap.

106 Karon, pila man ang ania dinhi karong gabii nga mga Cristohanon nga nasayod, nga sumala sa Mga Hebreohanon, sa Basahon sa Mga Hebreohanon, nga si Jesus sa karon usa ka Labaw'ng Sacerdote, ang Labaw'ng Sacerdote nga arang matandog sa pagbati sa atong kaluyahon? Mao ba gayud Siya? Bueno, kung Siya mao sa gihapon ang Labaw'ng Sacerdote, mao rang buhatan, Labaw'ng Sacerdote, unsaon man Niya pagpamuhat kung ingon-ana? Mamuhat Siya sama lang gayud sa Iyang gipamuhat kaniadto. Nagatoo ba kamo niana? Mamuhat Siya sama lang gayud sa Iyang gipamuhat kaniadto, kung mahimo mong toohan kana. Bueno. Pila man ang nagatoo niana, itaas ang inyong kamot, moingon, “Ako gayud kini ginatoohan?”

107 Sige, sa dili pa sila magporma og linya sa pagpaampo, magkaaduna kita og usa ka linya sa pagpaampo dinha. Nasayod ako nga ania na Siya. Ako—ako—akong mabati ang Iyang Presensiya, ug ako—nasayod ako nga ania Siya. Duol ngari. Andam na ba ang maong linya sa pagpaampo? Mangtawag na ako unta dinha. Inyo lang—mag-ampo lang, tan-aw lang dinhi dapit ug mag-ampo, toohi lang.

108 Usa ka gining ang nagalingkod dinhi nga nagatan-aw mismo kanako, nga nagalingkod sunod sa usa ka gining nga nakaantipara. Dili ba ninyo makita Kanang anaa nga nagapaibabaw nianang maong babaye? Tan-awa dinhi. Kita n'yo? Nagaantus siya sa sakit sa kasingkasing. Nagatoo ka ba

nga ayohon ka sa Dios? Kung nagatoo ka, itaas ang imong kamot. Mao kana kung unsay imong sakit. Husto kana. Karon kung mao kana ang imong sakit, ipataas ang imong kamot aron makita sa mga tawo, itaas ang imong kamot sama niana. Karon, wala na kini kanimo karon. Giayo ka sa imong pagtoo.

109 Siya ang mao sa gihapon kagahapon, karon, ug hangtud sa kahangturan. Oh, adunay kasukwahian; apan si Jesus Cristo mao sa gihapon kagahapon, karon, ug hangtud sa kahangturan. Kini bay. . . Karon pagpadayon lang sa pag-ampo, kita n'yo, dili mo na kinahanglan nga maania dinhi, aron nga mahibaloan mo.

110 Karon, usa kini ka babaye. Kutob sa akong nahibaloan, wala ko pa gayud siya nakita sa tibuok kong kinabuhi, usa lang siya ka babaye nga nagatindog dinha, ug nga may prayer card, ug wala ka nahibalo kung pagatawagong ka ba o dili. May naghatag lang kanimo sa prayer card, ug ang imong—imong numero gitawag, mao nga mianhi ka lang dinhi. Husto ba kana? Ug wala gayud ako'y paagi nga maila kung unsa ikaw, kung kinsa ka, kung asa ka gikan, kung unsay imong gikinahanglan, wala gyud bahin niini. Tawo lamang ako, ikaw ang babaye. Husto kana. Nahitabo na kining mao rang larawan diha sa Biblia, sa San Juan, sa ika-4 nga kapitulo.

111 Karon moingon kamo, “Unsa man kadtong imong gibuhad, Igsoong Branham, bag-ohay lang, dili pa dugay?” Medyo nag-inggansa lang ako, kita n'yo. Wala ako kahibalo, kita n'yo. Siya kinahanglan ang mobuhad niini. Wala ako kahibalo. Giunsa man nianang babaye dinha? Wala ko pa gayud nakita kanang maong babaye sa tibuok kong kinabuhi. Bug-os siya nga di-kaila kanako. Nagtoo ako nga usa ka babaye kadto. Kinsa man kadtong maong tawo nga bag-ohay pa giayo dinha sa mga mananambong? Mahimo mo bang. . . Oo. Dili kita managkaila sa usa'g usa. Kung husto kana, iwarawara ang imong kamot sama *niini*. Kita n'yo? Wala ko pa gayud nakita ang maong babaye. Apan naglingkod siya dinha, nga nagatoo. Karon, nahikap niya ang Usa Ka Butang, dili ba? Walay mahimong kaayohan ang paghikap kanako.

112 Apan dili ba ninyo nakita karon nga eksaktong Pulong gayud sa Dios ang Biblia? Siya ang mao sa gihapon kagahapon, karon, ug hangtud sa kahangturan. Nahimo kitang mga tabernakulo nianang Balaang Espiritu nga mao si Cristo. Kita n'yo? Kana ang tinuod nga Binhi. Nan kung mosulod na kanang Balaang Espiritu sa tinuod nga Binhi sa Pulong, dili. . . dili kabahin lang Niini ang kuhaon Niini (tungod kay, ginagamit usab sa Yawa Kana), kinahanglan mong kuhaon ang kinatibuk-an Niini, kita n'yo, ang matag Pulong Niini; tungod kay, dili Siya katunga nga Dios, Siya ang tibuok nga Dios. Kita n'yo? Ug mao kana kung unsay nagakahitabo.

113 Karon, ania ang usa ka babaye, wala ko pa gayud siya sukad nakita. Nakatagbo si Jesus og usa ka babaye usa ka higayon sama niini, tingali dili pareho ang kahimtang, wala ko kahibalo. Ug nagalingkod Siya kaniadto sa atabay. Iyang—gikinahanglan Niyang moadto didto sa Samaria. Ug nahibaloan nato, nga ubos sa bungtod ang Samaria. Ug—ug paadto Siya niadto sa Jericho, diay, ug milibot siya sa Samaria, ug miabot ngadto sa siyudad sa Sychar. Ug milingkod Siya sa atabay, ug gisugo ang Iyang mga tinun-an para may makaon.

114 Pila man ka mga kaliwat sa tawo ang ania sa kalibutan? Tulo. Kay Ham, Shem, ug mga kaliwat ni Japhet. Gikan kitang tanan kang Noe. Ug ang tanan na nga uban pang bahin sa kalibutan gilaglag niadtong panahona. Tulo lang ang kaliwat sa tawo, kanang Judio, Gentil, ug Samarianhon (nga katunga Judio ug katunga Gentil). Ug mao na kana ang tanan nga mga kaliwat nga ania sa kalibutan, kita n'yo, tulo lang.

115 Ang tanang butang sa Dios nagakahingpit sa tulo. Sama gayud niining tulo nga akong ginahisgotan karong gabii; tulo ka ang-ang sa kasukwahian, tulo ka ang-ang nga ang Pulong nahimong unod, uban pa. Kita n'yo?

116 Karon, ug Siya—Siya nga nakigsulti ngadto sa mga Judio, giingnan si Felipe, sa pagdala niya didto kang Natanael, nga kung asa siya dapit kaniadto, ug miingon, “Nakita Ko na siya sa didto pa siya ilalum sa maong kahoy.” Iyang giingnan. . . Nadala na didto ni Andres si Pedro, miingon Siya, “Simon ang imong ngalan, ug pagatawgon ka na nga ‘Pedro’ sugod karon.” Miingon, “Anak ikaw ni Jonas.” Kita n'yo? Karon, kadto’y mga Judio tanan.

117 Apan ania Siyang nagaadto sa usa ka Gentil. . . dili sa usa ka Gentil, kondili sa usa ka Samarianhon.

118 Karon mao na ang panahon sa Gentil. Wala pa gayud Niya gibuhat kana sa usa ka higayon ngadto sa mga Gentil. Susiha ninyo ang mga Kasulatan. Wala pa gayud. Apan nagsaad Siya, diha sa Lucas 22, nga Iyang buhaton kini sa dili pa gayud ang maong Pag-abot.

119 Apan naglingkod Siya didto, ug ania nagaabot ang usa ka may dugong Judio ug Gentil didto, usa ka babaye. Ug nag-ingon Siya ngadto kaniya, “Babaye, hatagi Ko og mainum.”

120 Miingon siya, “Hala, dili ka angay mohangyo niana, gayud. Kita’y. . . Adunay panagbahinbahin dinhi. Usa ka ka Judio, ug—ug usa ako ka Samarianhon.”

121 Miingon Siya, “Apan kung nakaila ka lang kung Kinsa ang nagapakigsulti kanimo, mangayo gayud ka Kanako og mainum.” Unsa may Iyang ginabuhat? Nagpakighinabi sa iyang espiritu. Ug dihadiha pagkahibalo Niya kung unsay iyang problema, bueno, Iya siyang gisultihan nga adtoan ug kuhaon ang iyang

bana. Nag-ingon siya nga wala siya’y bisan usa. Ang ingon Niya, “Husto kana, nagkaaduna ka na’y lima.”

¹²² Karon, tan-awa, sa dihang nakita Siya sa mga Fariseo nga ginabuhat kana. Husto, kadtong kasukwahian taliwala mismo sa Pulong, unsa ma’y ilang gisulti? Nag-ingon sila, “Si Beelzebub kining Tawhana, usa ka manghihimalad.” Kita n’yo?

¹²³ Ug nag-ingon si Jesus, “Ang si kinsa man nga mosulti niana ngadto sa Espiritu Santo sa dihang moabot na Kini sa pagbuhat sa mao rang butang, dili na gayud pasayloon.” Kana’y inyong kasukwahian. Kita n’yo? Apan gisulti Niyang Iya silang pasayloon kaniadto, tungod kay wala pa miabot ang Balaang Espiritu; ang Halad, wala pa niadto gipatay ang Cordero.

¹²⁴ Apan wala kana gihunahuna sa maong babaye. Miingon ang maong babaye, “Sir, naila ko nga Ikaw usa ka propeta.” Dili sila nagkaaduna og usa ka propeta sa gatusan na ka mga katuigan. Miingon, “Naila ko nga Ikaw usa ka propeta. Karon, nasayod kami nga ang Mesiyas, nga maoy gitawag nga Cristo, sa dihang moabot na Siya, ingon niana ang Iyang pagabuhaton.”

¹²⁵ Bueno, kung ingon niana ang Iyang gibuhat, nan mao Siya sa gihapon kagahapon, karon. Mao kana kung giunsa Niya pagpaila sa Iyang Kaugalingon kaniadto, dili ba mao ra kini sa gihapon karon? Kinahanglan mao gayud! Karon, ania nagakatagbo na usab ang usa ka babaye ug usa ka lalaki. Dili siya kadtong babaye, dili ako kadtong maong Lalaki. Kondili ang mao ra sa gihapon nga Balaang Espiritu ang ania dinhi, ug naghatag sa saad nga ang mga buhat nga Iyang gibuhat, ato usab pagabuhaton ang mao rang butang diha sa mga adlaw nga ang Anak sa tawo igapadayag na.

¹²⁶ Karon, sa dili pagkaila kaninyo (ug nasayod kamo nga tinuod kana), sa tuman nga dili kita managkaila sa usa’g usa, ug nagatindog ka dinhi. Adunay pipila. . . Tingali adunay problema diha kanimo, tingali wala, wala ko kahibalo. Apan kung igapadayag ni Ginoong Jesus kanako, pinaagi sa Iyang Balaang Espiritu, kung unsay imong problema, imo bang toohan kung ingon-ana nga Kini ang Anak sa Dios, ug dili usa ka tawo? Usa lang kini ka tipaka, *kining* tabernakulo nga—nga gigamit sa Dios, ang si bisan kinsa nga Iyang gipili. Siya—Siya kanang nagabuhat pinaagi sa Iyang gamhanan nga grasya ug pagpili. Busa, apan nagatoo ka ba. Imo bang toohan? [Ang babaye nagaingon, “Amen”—Ed.]

¹²⁷ Pila man sa mga mananambong ang motoo niini? Ania kaming pareho nagatindog mismo dinhi atubangan sa Kahayag, nga wala pa gayud kami sukad nagkatagbo niining kinabuhi, wala ko’y ideya kung kinsa kana nga babaye, kung unsa siya, kung asa siya gikan, kung unsay iyang kinahanglan. Wala ko pa siya sukad nakita sa tibuok kong kinabuhi, mao sa gihapon nga wala ko pa sukad nakita kanang babaye nga anaa *dinha*

sa tibuok kong kinabuhi. Apan, kita n'yo, ania kung unsa ang ginapaninguhaan kong ipabuhat kanimo: isalikway kana nga kasukwahian palayo kanimo karon, ug toohi ang Pulong sa dihang nahimo nang unod ang Pulong dinhi mismo sa taliwala kanato. Nahimo nang buhi ang Pulong diha sa kaugalingon natong unod, nga nagapakita kana sa Presensiya sa Dios.

¹²⁸ Hinaut karon nga Iyang itugot kini ngadto kaniya. Nangandoy siya sa usa ka mahinungdanong butang. Wala siya'y anak, gusto niya og usa ka anak. Mga kuwarenta na ang iyang panuigon. Siguradong dili na kana mahimo pa.

¹²⁹ Naglingkod sila mismo dinha karon, mga babayeng dili na makaanak sa tibuok nilang kinabuhi, ug mianhi sa entablado sama niini, ug gihatagan sila sa Dios og mga anak. Ang pipila kaninyo nga nasayod dinha itaas ang inyong kamot. Kita n'yo? Kita n'yo? Akong gikugos ang usa ka gamay'ng pinangga nga batang babaye sa miaging adlaw, sa Dominggo, paghawa ko dinhi, Dominggo sa hapon; nga kadtong iyang inahan dili na makaanak, misulti ang Dios. Ug ang batang babaye, ang makapahimuut kaayong butang, ania ba siya karon? Asa na siya? Oo. Ania siya, dinhi mismo, naglingkod mismo dinhi dapit. Naglingkod ang inahan dinha. Ania ang maong batang babaye, siya mismo. Nakita ninyo siya? Usa siya ka gilitok nga Pulong sa Dios.

¹³⁰ Karon, motoo ka ba Kaniya sa tibuok mong kasingkasing? Nagatoo ka ba nga kanang panalangin nga anaa kanimo, nga mabati mong anaa na kanimo karon, mao na ang Dios nga nagatubag? Kung isulti sa Dios kanako kung unsay imong ngalan, aron nga mahimo mo nang pangalanan ang maong bata, motoo ka ba? Kung ingon-ana, Mrs. Thompson, makapauli ka na ug maangkon mo na ang imong anak, kung toohan mo kini sa tibuok mong kasingkasing.

¹³¹ Nagatoo ba kamo sa tibuok ninyong kasingkasing? Magkaaduna lang pagtoo, ayaw pagduhaduha, toohi lang ang Dios. Dios ang Dios.

¹³² Kumusta ka na, sir? Nagtoo ako nga dili kita managkaila sa usa'g usa, usab. Ang bugtong higayon nga nakita ko ikaw sa tibuok kong kinabuhi, sa nasayran ko, maoy sa dihang nakita ta ka nga nagaduol dinha. Ug abi ko nga uyoan ka ni Igsoong Shakarian, o kining si... Mashagian, si Igsoong Mashagian, ang mag-aawit, sa dihang milabay ka. Ug dayon nakita ta ka nga mipadulong sa linya sa pagpaampo. Karon, ingon nga usa ka estranghero sama nimo, ug, o diha kanimo, ug ako nga usa ka estranghero, kita sa usa'g usa. Karon, kung isulti ni Ginoong Jesus ang usa ka butang nga ikaw—nga ikaw, tingali may panginahanglan ka, ingnon na lang nato nga ingon niana; isulti kanimo kung unsa, nga igasulti kanako kung unsay imong panginahanglan. Karon, Iya nang gihatag kini kanimo. Ang

butang lang mao nga magkaaduna ka'y igong pagtoo aron toohan kini.

¹³³ Karon, pila man ang nakasabot niana? Igo lang nga pagtoo aron toohan nga naangkon mo na ang imong ginahangyo! Kita n'yo?

¹³⁴ Karon, karon, kung ania ka dinhi nga nanginahanglan og usa ka butang, ug mahimo Niyang itug-an kanako kung unsay imong tinguha, dayon nasayod ka nga ako wala'y kasayuran sa imong tinguha, kung ingon-ana Usa ka Butang kini nga ania dinhi nga maoy nagabuhat niini. Karon, sumala sa Pulong, nagsaad Siya sa pagbuhat niana. Naila Niya ang mga hunahuna sulod sa ilang mga kasingkasing. Husto ba kana? Sige.

¹³⁵ Daku ang imong tinguha aron nga maayo. Ang usa ka butang, nagaantus ka sa usa ka sakit nga nerbiyos, tuman nga pagkanerbiyoso. Husto kana. Usa pa ka butang, aduna ka'y sakit sa likod, ug kana nga likod nagkasamot pa sulod sa dugay na nga panahon, nagkaaduna ka pa gani og operasyon niini. Kana'y MAO KANA ANG GINAINGON SA GINOO. Tinuod kana. Kita n'yo. Husto kana. Ug ania pa ang usa ka butang, ang daku mong tinguha, maoy, gipangandoy mong madawat ang bautismo sa Espiritu. Eksakto gayud kana. Duol ngari.

¹³⁶ Minahal nga Dios, sa Ngalan ni Jesus Cristo, hinaut nga mapuno sa Espiritu Santo kining lalaki, sa dili pa siya mohawa niining dapita, sa Ngalan ni Jesus. Amen.

Karon dawata Kini, igsoon ko. Magkaaduna ka lang og pagtoo, ayaw pagduhaduha.

¹³⁷ Kumusta ka? Sa pagtoo ko, sa pagkasayod ko, dili kita managkaila sa usa'g usa. Kung husto kana, aba, aron masayod ang mga tawo, itaas lang ang imong kamot aron nga makita nila nga dili kita managkaila. Wala ko pa sukad siyang nakita sa tibuok kong kinabuhi, sa nasayran ko. Ug siguro wala pa gyud niya ako nakita sukad, gawas lamang dinha sa mga mananambong. Tungod kay nasayod ang Langitnong Amahan, ug ania nakabuklad ang Iyang Pulong, nga wala ko pa gayud nakita sukad ang maong babaye, sa nasayran ko, sa tibuok kong kinabuhi. Busa, dili nako mahibaloan kung alang sa unsa ang pag-anhi mo dinhi, wala ko'y ideya kung kinsa ka, unsa ka, o wala gayud bahin kanimo. Wala gayud ko'y masulti kanimo og usa ka butang.

¹³⁸ Ang butang lamang, usa kini ka gasa. Kon mahimo kong. . . Sumala sa nadungog mo na nga akong gisaysay kana sa dili pa lang dugay. Nagapadaplin lang ako, ginapaminawan kung unsay Iyang ginaingon; kung unsay akong makita, mahimong isulti ko kini. Kung unsa may wala Niya ginasulti, dili ko mahimong isulti. Kung isulti ko kana sa akong kinaugalingon, ug mamahimong sayup Kini. Kita n'yo? Mamahimong sayup Kini. Apan kung Siya ang nagasulti niini, husto gayud kini. Dili gayud

Kini mahimong, wala pa gayud kini sukad nasayup. Dili gayud
Kini masayup samtang nga nagapabilin kining iya sa Dios. Kita
n'yo? Kita n'yo, tungod kay dili masayup ang Dios.

¹³⁹ Apan kung mahimong isulti sa Dios kanako kung unsay
imong gusto, kung unsay imong tinguha, o—o alang sa kung unsa
nga ania ka, butang nga imong nahimo, o kung unsa man, butang
nga sama niana, o kung kinsa ka man, kung asa ka man gikan,
o unsa pa man nga gusto Niyang itug-an kanako, motoo ka ba?
Salamat.

¹⁴⁰ Usa ka butang, aduna ka'y sakit sa imong tiil. Nagproblema
ka sa imong tiil. [Nagaingon ang maong babaye, "Oo"—Ed.]
Husto kana. Itaas ang imong. . . Aduna ka'y sakit nga iya
sa babaye, pang-babaye nga balatian. ["Oo."] Ug aduna ka'y
dakung tinguha sa imong kasingkasing, tungod kay adunay usa
ka tawo o butang nga nawala kanimo. Usa kini ka bata, ug
ang anak mo nga lalaki mibiya sa panimalay, milayas, ug gusto
nimong moampo ako nga mobalik siya. ["Oo."]

¹⁴¹ Dios nga anaa sa Langit, ipadala balik kaniya ang iyang
anak, ug ang kaayohan. Ipahunong sa Balaang Espiritu kanang
batan-ong lalaki diha sa dalan karong gabii, ipapauli siya sa
iyang inahan. Sa Ngalan ni Jesus. Amen.

¹⁴² Siya Nga nakaila maoy magapabalik kaniya nganha
kanimo. Ayaw'g kabalaka. Toohi karon, ayaw pagduhaduha.
Magkaaduna lang og pagtoo, sa tibuok mong kasingkasing.
Toohan mo, ug igahatag sa Dios ang tanang uban pa niini.

¹⁴³ Karon, sa kadtong tulo o upat lang ka mga pag-ila, kung
unsa man kadto, kita n'yo, ako—mipadayon lang ako hangtud
nga nagkahanap na kini kanako. Dili ko kana masaysay, walay
paagi nga masaysay kini. Moingon ka, "Ang pasabot mo, ingon-
ana lang ka mas hilabihan pa kay sa nagwali ka dinha sulod sa
kuwarentay-singko minutos o labaw pa, sa hunahuna mo? Oo,
sir. Kung tulo pa kini ka oras, dili kini gihapon mamaingon niana
ka hilabihan.

¹⁴⁴ Usa ka babaye ang mihikap sa sapot sa atong Ginoong
Jesus. Ug wala nagahikap kana nga mga tawo kanako. Aba,
kining babaye dinhi, tan-awa lang dinhi, mahimo niyang. . .
[Ginaingnan ni Igsoong Branham ang maong babaye, "Hikapa
ako sa imong kamot, kita n'yo."—Ed.] Iya na akong gihikap, dili
magpulos, usa lang ako ka tawo. Apan gikinahanglan sa babaye
nga hikapon Siya. Ug ako, pinaagi sa usa ka gasa, igo lang—
igo lang. . . nagakawala lang kini, nagakawala ang tibuok kong
kaugalingon, ug ako lang ginasulti kung unsay akong makita.
Kita n'yo? Ug mao lang kana. Kita n'yo, walay mahimong butang
ang paghikap kanako, apan ginahikap niya si Jesus pinaagi
kanako. Ingon niana kung giunsa paghikap niadtong babaye ang
Dios pinaagi kang Jesus, sa dihang wala Siya nahibalo kung
unsay sakit niya. Iya lang gihikap ang Iyang sapot, mihawa ug

naglingkod na. Ug nag-ingon Siya—ug nag-ingon Siya, “Kinsa ma’y mihikap Kanako?”

¹⁴⁵ Ug giingon sa mga apostoles, “Hala, tanan man ang nagahikap Kanimo. Nganong moingon Ka man niana?”

Miingon Siya, “Apan nabati Ko nga may gahum nga migula Kanako.”

¹⁴⁶ Karon, nasayod ba kamo kung unsay gahum? Kusog. Naluya Siya sa usa ka paghikap Kaniya sa usa ka babaye, ug Siya ang Anak sa Dios. Unsa ra man ako, usa ka makasasala nga naluwas pinaagi sa Iyang grasya. Nasayod ba kamo kon ngano nga labaw pa kini? Tungod kay nag-ingon Siya, “Kining mga butang nga Akong ginabuhay, inyo usab pagabuhaton. Labaw pa niini ang inyong pagabuhaton, kay Ako moadto sa Akong Amahan.” “Labaw pa,” ang giingon Niini dinha, apan ang hustong hubad sa Griyego maoy, “Mas daghan pa niini ang inyong pagabuhaton.”

¹⁴⁷ Karon, wala ako nakaila sa maong babaye. Wala gayud ako’y kasayuran bahin kaniya. Ingon siya ka tumang di-kaila kanako sama sa maong mga tawo kaganiha. Dili kami managkaila sa usa’g usa. Para lang nga masayran kini sa mga tawo, mahimo mong itaas ang imong kamot, ingna “dili kami managkaila.” Karon, ang Anak sa Dios, kung Iya sa usa ka higayon nahibalag ang usa ka babaye didto sa usa ka talan-awon sama niini, duol sa atabay, ug nakigsulti Siya ngadto kaniya sa makadiyut, ug nasayran Niya kung asa ang iyang problema, ug Iya siyang giingnan kung unsay iyang problema. Ug busa nakaila siya pinaagi niana, nga mao kadto ang Mesiyas. Karon nga—nga akong. . . Nahikap mo na ako, nahikap ko na ikaw, ug walay nahitabo. Apan kung sa akong pagtoo (pinaagi sa usa ka gasa) ug sa imong pagtoo (pinaagi sa pagtoo niini) mahikap Siya, ug mahimo Siyang mosulti pinaagi kanato aron. . . pinaagi kanako nganha kanimo, kung ingon-ana masayran mo nga ania Siya sama nga atua Siya niadtong—niadtong atabay sa Sychar. Kita n’yo? Siya mao sa gihapon kagahapon, karon, ug hangtud sa kahangturan. Nagatoo ba kamo niana?

¹⁴⁸ Aduna ka’y daghang mga sakit, daghan kaayong mga balatian, mga komplikasyon! Usa sa mga unang butang nga gusto nimong paampoan mao ang arthritis. Husto kana. Husto ba kana? Nanuskig ka tungod sa arthritis. Kung makita mo imong ginapataas ang imong bukton. . .

¹⁴⁹ Ug medyo mahinay kang molakaw, sa kutob sa akong paghinumdum. Tingali hulat lang sa makadiyut lang, adunay uban pa tingaling mahimong masulti nga magpawala sa. . . O, kabalo na mo, mabati mo ang mga butang; mga tawo, kabalo na mo, daw sa usa ka gininhawa nga nagasumpaki Niini. Nagaingon sila, “Hala, iya kanang nasalagmaan,” o, kabalo na mo, daw sa ingon niana.

150 Apan, daw sa maayo ka man nga tawo, pagpakigsulti lang kanako sa kadali. Motindog lang kita dinhi sa kadali, tungod kay aduna pa gayud siguro og uban pang butang nga anaa sa imong kasingkasing nga ginapangamuyo mo sa Dios. Karon, dili ko matubag ang imong pangamuyo, apan mahimo Niyang ipa . . . Tungod kay, kung nagatoo ka niini, natubag na kini. Apan kon gusto mo gayud toohan kini; aron nga mapatoo ka. Karon, sultihan ta ka, mahitungod kini sa usa ka minahal nga wala dinhi, ug usa kana ka igsoon nga lalaki, ug kana nga igsoon wala gani dinhi niining banwa. Atua siya sa matubigon nga banwa, daghang mga lanaw. Masulti ko nga daw butang nga medyo anaa sa Michigan o kaha . . . Oo, sa Michigan maoy kung asa kini. Ug nagaantus siya sa usa ka makapatay nga sakit, ug kana mao ang dili na matambalan nga sakit sa kidney nga nagpaantus kaniya. Husto kana, dili ba? Kana’y MAO KANA ANG GINAINGON SA GINOO. Karon, ang panyo nga anaa sa imong kamot, nga imong gibayaw ngadto sa Dios, ipadala kana sa imong igsoon ug sultihni siya nga dili gayud magduhaduha, kondili toohan gayud, ug mao kana’y, mamaayo na siya karon kung toohan mo kini.

151 Nagatoo ka ba sa tibuok mong kasingkasing? Kita n’yo, kung ingon-ana, kung nagatoo ka, adunay usa lang ka butang nga pagabuhaton, kana’y, ang bug-os nga pagdawat niini. Husto ba kana?

152 Karon moingon ka, “Ginatan-aw niya kana, silang mga tawo. Ingon niana ang iyang ginabuhat, ginatan-aw sila.” Daghan nang ingon niana ang inyong nakita!

153 Apan aron nga mahibaloan ninyo kini. . . Kining babaye dinhi, ari ka niining dapita, gining, dinhi, ang maong pasyente, kung kinsa ka man. Wala ako nagalantaw kaniya. Nagatoo ka ba nga mahimong ipadayag kanako sa Dios kung unsay imong sakit? Itaas ang imong mga kamot, kung nagatoo ka, kining gining dinhi, kining gining dinhi, ang pasyente. Oo. Oo. Sige, nan kung toohan mo kana sa tibuok mong kasingkasing, kanang pagkaasmahon nga sakit dili na mohasol pa kanimo. Sige, pauli ka na ug toohi kini! . . . ? . . .

154 Wala ako milantaw kaniya, milantaw ba Kini? Kita n’yo, Siya’y. . . Nagalantaw ka *niining* dapita, anaa lang dinha ang panan-awon bisan unsa pay mahitabo. Amen! Dili ba ninyo makita kini? Ingon ka hingpit gayud kung unsa ka hingpit ang Dios!

155 Nagatoo ka ba, usab? Mahimo nang mohawa ang asma kanimo, usab, dili ba? Nagatoo ka bang mohawa kini? Sige, adto na og sultihni ang Ginoong Jesus nga ikaw—ikaw nagatoo Kaniya.

156 Moabot ang adlaw nga kinahanglan mo nang pagadad-on ang usa—usa ka gamay’ng sungkod bisan asa kung mabalda ka na nianang maong arthritis, apan dili kini mahimo niini. Dili ka mabalda, wala ka nagatoo nga mahitabo kini, dili ba? Nagatoo

ka ba nga mamaayo ka na? Paglakaw na, ug giayo ka na ni Jesus Cristo.

¹⁵⁷ Nagapatay sa mga tawo ang sakit sa kasingkasing, apan dili ka kinahanglan patyon niini. Nagatoo ka ba nga ayohon kini sa Dios alang kanimo, ug mamaayo ka na? Lakaw nga ginatoohan kini sa tibuok mong kasingkasing, nagaingon, “Tinuod akong nagatoo alang niini.”

¹⁵⁸ Makasulti ka ba’g English? Makasabot ka ba og English? [Nagaingon si Igsoong Branham, “Si kinsa man mahimong moduol.” Usa ka tighubad ang nagaduol—Ed.] Oo, sige. Mahimo mo bang isulti sa maong babaye kung unsay ginaingon ko kaniya? Sultihi siya nga kung motoo siya, mobiya kaniya ang sakit sa tiyan. Iyang—iya bang toohan kini? Ang imong sakit sa likod mobiya pud kanimo, busa mahimo ka nang molakaw karon ug nga naayo na.

Kumusta ka? Nagatoo ka ba? [Nagaingon ang babaye, “Oo, sir.”—Ed.]


¹⁵⁹ Kanang lalaki nga nagalingkod dinha nga may sakit sa likod, nga nagalantaw kanako sa pagsulti ko niana. Mahimong mamaayo siya, usab, kung toohan mo kini, sir. Sige, sir.

¹⁶⁰ Ang babaye nga nagalingkod mismo sunod kanimo dinha, anaa ka’y sakit sa liog, dili ba, gining? Nagatoo ka ba nga ayohon ka sa Dios? Gusto mong pandongan sa mga kamot ang gamayn’g batang lalaki para sa iyang mga tuhod, ug mamaayo siya, usab. Nagatoo ka ba niini? Aduna ka’y sakit nga iya babaye, balatian pang-babaye, wala na kini sa imo karon. Giayo ka na sa imong pagtoo ug bug-os nang giayo.

¹⁶¹ Nagatoo ka ba nga si Jesus Cristo, mao sa gihapon kagahapon, karon, ug hangtud sa kahangturan? Kung ingon-ana ipandong nato ang atong mga kamot sa usa’g usa ug iampo kining pag-ampo sa pagtoo, ang matag-usa kanato, mag-ampo sa maong pag-ampo sa pagtoo.

¹⁶² Minahal nga Dios, samtang nga bug-os kaming gilukopan sa Imong Balaanong Presensiya, nga makita Kang nagalihok diha sa mga mananambong, nagapang-ayo sa mga sakit sa matag dapit. Ikaw mao ang Dios. Nagaampo ako nga Imong ayohon ang tibuok niining mga mananambong. Tugoti nga ang Gininhawa sa Dios magakunsad nga lab-as pasulod sa ilang mga kasingkasing, ug ipakisayod kanila nga nagahinapos na ang panahon. Mubo na lang nga panahon nga mamaania kami dinhi, dayon makauban na namo Siya Nga maoy among gihigugma. Ug hinaut karon nga ang Iyang Presensiya maghatud og kaayohan ngadto sa matag-usa.

¹⁶³ Among ginapakahimaraut si Satanas, among ginapakahimaraut ang tanan niyang mga buhat. Sa Ngalan ni Jesus Cristo, Satanas, pahawa gikan sa mga tawo.

¹⁶⁴ Ang tanan nga motoo Kaniya karon, ug nga nagadawat sa inyong kaayohan, magtindog, moingon, “Nagatindog ako karon aron dawaton ang akong pag-ayo. Ginatoohan ko kini.” Bisan unsa pa man ang imong kahimtang, kung imo gayud toohan kini, manindog kamo. Karon ipataas ang inyong mga kamot, ug moingon, “Salamat, Ginoong Jesus, sa pag-ayo Mo kanako.” Ang Dios magauban kaninyo. 

ANG BINHI SA KASUKWAHIAN CEB65-0118

(The Seed Of Discrepancy)

Kining Mensahe ni Igsoong William Marrion Branham, una giwali sa Ingles niadtong Lunes sa gabii, Enero 18, 1965, sa Full Gospel Business Men's Fellowship International sa Westward Ho Hotel sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2010 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org